


# *BIVÛLUKILU BYÀ NZAMBÌ*

## *BYELA KU MATEETA À BIKONDO*

 Nenku kunyunguluka anu ne cyôci aci, mu Bible mujima, mushindu wutûtù. . . wa bwena wunwàngâci Mukanda wa Bwakabuulwibwa, ne Mukanda wa Ekesoode ne wa Genese awu. Nenku mpindyewu ndi mwalukile kumbelu bwa mêmè kuya katwa buluwà bwa nshindi. Nne meeji matooke ônsò. Ke cyônsò cidiku ncyôci aci, anu kwikala ne meeji matooke. Nenku, Mwaneetu Roy, uyaaya dîbà kaayi? [Mwaneetu Roy udi wamba ne: “Maalaba.”—Muf.] Maalaba. Eyo. Pa nanku tutu banange kwalukila kumbelu mu cikondo eci cya cidimu, nenku, cidi, tudi baswe kwikishaku.

<sup>2</sup> Ndi mujimije bujitu bwa livres makumi abidi [kilô 9] kubangila musangu wa ndekeelu wûmvwà munumone awu. Mvwa mubande pa cipimu, pângûmùkù mu disangisha edi apu, mvwa ne bujitu bwa livres lukama ne makumi asambombo ne itaanu [kilô 74,8]; kadi dya ngaalukila, nkaadi ne bujitu bwa livres lukama ne makumi anaayi ne itaanu [kilô 65,8]. Pa nanku, ndi ndyumvwa anu bu ne bilàmbà bidi byamba kummata’s. Pa nanku, ndi mujimije bujitu bwàbûngì be.

<sup>3</sup> Nenku inâbànzà mukwabo, leelu ewu, mu dipatuka, mwaneetu wa bakaji mulenga’s, kwambaye ne: “Mwaneetu Branham, nsambidileku bwa njimije bujitu, mêmè paanyi.” [Mwaneetu Branham udi utudika mu tuseku—Muf.]

<sup>4</sup> Kadi yêyè udiku ndambu ku luseke lwa bantu baa mibidi minene, ke mêmè kumwambila ne: “Lwâku anu cyanaana, ikala anu undonda, uyiisha ne bukole bwebe bwônsò.” Pa nanku, ke cyônsò cîndiku paanyi mumanye ncyôci aci, ncyà bushuwa ne ke cyapwekesha bujitu. Kadi, abidi adi panshi aa netushiyangane ne ntatu ne mateeta.

<sup>5</sup> Mvwa munkaci mwa kwela meeji pa dikulakaja. Nudi bamanye’s, mu bidimu bikwabo bibidi emu, nêngîikalè ne bidimu makumi ataanu. Yoyôyô! Ndi mvuluka pavwa Frankie Weber wela mulambu. Yêyè mmumpite anu ne bidimu bitwe ku bibidi cyanaana. Ûvwa mwele mulambu wa cinjanja cya meeya makumi abidi ne ataanu [Fc 400] bwa mufikilu wa dileediibwa dyende, mwaba ewu. Ke mêmè kutuuta mupodi, e kudyambidila ne: “Ekelekele, Frankie Weber, ne bidimu makumi abidi ne bitaanu, cya binaayi cimwe cya lukama!” Byênji cyabibidi cimwe mpindyewu. Kabyena nansha binenga to, s’mmwômò’s? Bidi anu kacya byangatangana’s.

<sup>6</sup> Katwakushaala ntanta mule to. Anu mu dinda emu, pavwa mwaneetu munanga utwala diyiiisha dya ditambe kwikala dya pabwadi adi, ndi mutwishiibwe ne nditusankishe twêtù bônso. Ke kumvwilabi ne ngèlè meeji ku cintu kampanda pavwaye munkaci mwa kuyiisha apu, paanyima pààpa, ke mêmè kudyambidila ne: “Pàmwàpa Mukalenge mmufwanyineku kumpa Mufundu bwa cyôci aci.” Mvwa mumwambile bwa kubalaye mikwabo diloolo edi ya mu Dìyì dibenesha dya Nzambi. Nenu mpindyewu ndi . . . anu tusunsa tukese cyanaana twa dyakula, nenu pathiishe netusambidile babeedi, bu pa ciibidilu.

<sup>7</sup> Ne mu diisâtù diloolo, diisâtù dilwalwà edi diloolo, bu Mukalenge mwa kwanyisha, ndi muswe kubanga Mukanda wa Ebelu, piikalabi bikumbane. Nenu Mukanda wa Ebelu awu, bwa dileesona. Ne pathiishe, pàmwàpa, mu dyalumingu mu dinda anyi mu dyalumingu diloolo, kutungunuka naaci. Pathiishe diloolo dya mu diisâtù dyalonda, pàmwàpa kucyangata cyakabidi, kutungunuka anu ne kunyunguluka naaci, mu Mifundu.

<sup>8</sup> Nenu kudi bintu kampanda bìndì mumone mu ekeleeziya, pântù mpita apa, bìndì ngeela meeji ne bivwa bikengela kulongeshiibwaku ndambu, nudi bamanye’s, bintu bìdi bimwèka bu bìdi bitekeshanganà makanda ndambu. Nenu ndi ngeela meeji ne tudiku bafwanyine kubyangula mu Ebelu amu. Cidi—cidi nshapita mulenga be, mwaba mwîmpè be wa kubala. Mpindyewu, Mwaneetu Neville . . . Nkaavwa . . . Aci ncivwa cimvwile mu meeji, cintuulukile.

<sup>9</sup> Nenu ndi mfuma ku dipeta Dipungila Dipyadipya mwaba ewu, ne ndi munkaci mwa kubala mu Bible wa Collins, mudibo bafunde ne maleeta maneneku. Ndi ne . . . Paanyima paa mêmè mumane kupeta bidimu biipacila ku makumi ataanu, bikengela ngiikale mmuseemeja kule menemene naanyi, bwa kubala twine tumaleeta tukese menemene atu; mbukènkè bubi, twamb’eku twamb’eku. Kadi pândì mpatuka nya pa muunya ndi anu ntubala’s. Kadi padi bukènkè bulwa bushaadile ndambu, bìdi bikengela ngiikale mmuseemeja kule. Nenu ngangabuka mmungambile ne abidi adi panshi aa nebikengele ngiikale mvwala binete bya kubala naabi.

Ke mêmè kumukonka ne: “Mmèsù aanyi adi mabi anyi?”

<sup>10</sup> Ke kuâteetayè. Kwambaye ne: “To. Dikumi pa dikumi, aci’s ncilenga cya dikema. Makumi abidi pa makumi abidi adi mu ôwò, kadi—kadi dikumi ne itaanu pa dikumi ne itaanu mbîmpè kupita.” Kadi dikumi pa dikumi, udi, ke cyônso civwaye mufwanyine kucibala. Pa nanku mvwa mwa kubala kaaba kônso kavwaye muswe, mu ntanta kampanda. Yèyè kuteeka cintu kampanda mwaba awu, ke mêmè kubanga kucibala. Pavwaye wenda useemeja pabwipi, mêmè kubanga ngenda mbala bitekete

bitekete. Mêmè kwimana paavuci kufika bu mudi apa nunku ewu. Yèyè ne: “Kaa, eyo, ukaadi ne bidimu bipite pa makumi anaayi.”

Ke mêmè ne: “Eyo.”

11 Yèyè ne: “Ee, pa ciibidilu, tumonyi twebe twa mèsù tudi twenda tubeetelela.” Yèyè ne: “Mpindyewu, wèwè mushaale ne mwoyi, matuku àbùngì, neupete lumono lwebe lwibìdì, mûndi ntekemena. Apu mpawikala mwa kwalukila cyakabidi ku kubala.”

12 Kadi, nudi bamanye’s, mvwa mêmè anu ngeela meeji ne, aci kacyna kule menemene to, ku cyòci aci. Anu katanci kakese cyanaana. Mwaneetu Tony, aci’s ncibi’s, kî mmwômò anyi? [Mwaneetu Tony udi wamba ne: “To.”—Muf.] To, kî ncibi to. Ncintu cibeneshiibwe. Ndi ngenda nkola, mu mushindu kampanda, kadi mwikale ngenda mpingana ku bwânà mu mukwabo mushindu, bwalu ndi ngenda nya mutangile ku mubidi mwânà, udi kawuyi ufwa, mubeneshiibwe awu, mu wòwò awu, mwaneetu, kamwakwikalaku cintu kampanda cibi Kwaka to. Nunku ciine cikondo aci ke kiipacila kaa kwikalangana kwanyi ne mwoyi panwapa nkòkò aku. Aci’s neciikale cilenga be.

13 Mpindyewu, kumpala kwa mêmè kubala mufundu wa ndekeelu wa dyoya naawu, dîyì dimwe cyanaana dya kuMwambila Yèyè patudi twinyika mitu yetu apa.

14 Tudi twitabuuja, Nzambi wa Bukole bwònsò, ne dijinga Dyebe ndya ne bânà Beebe biikale ne disanka. Kabitu bilongolola bwa twètù kwikala ne mpala mikanga ne tunyinganyinga to, bwalu baakafunda, ne: “Mwoyi musangale udi wenza bimpè anu mudi bwanga bwa lwondapu.” Nunku tutu banange kusankila mabenesha Ebe ne kwikala pamwe mu bwobumwe bunene ebu. Nunku bu mutudi . . .

15 Twètù bu beena kwitabuuja baa Dîyì Dyebe, tudi mu bwobumwe banyungulukile Dîyì. Ke citudi bavwile mwaba ewu, kabyena anu bwa kuteeleja Diiisha kampanda to, kadi mbwa kuKukuukwila ne kubwela mu dymvwangana Neebe, ku dibala ne diyiisha dya Dîyì. Mpindyewu, Mukalenge, Wèwè kwakutwelaku mâyì ku makàsà to. Ndi mutwishiibwe ne Wèwè neutubeneshe munda mwa mèbà aa.

16 Beneshaku mpaasata wetu wa maalu malenga ne mwîmpè ewu, Mukalenge. Tudi tulomba bwa Wèwè kwikala nende. Ne anu mûndi mumumone leelu ewu, mu kuyiisha kwende, ne mumumone muvwaye ufukisha mimwemwe pavwaye wimba musambu awu wa ne: “Abidi adi panshi aa nênsiyanganè ne ntatu ne mateeta.” Ne bânà beetu baa bakaji baba, mushindu mwine uvwabo benda bawimba mu tuumitândà twa mu bisuku ne masangisha a mu cituudilu’s. Nunku ke cyènzekà, dimwe dya

ku matuku adi panshi aa, ne pashiishe netuye ku Diikisha dya butumbi adi.

<sup>17</sup> Mpindyewu, Taatu, utubenesheku patudi tubala Dîyi Dyebe apa, ne twêtù biine tukaadi baDibale, ne dimane kutalaja meeji etu ne myoyi yetu. Ne akulaaku neetu, diloolo edi. Ne piikala disangisha dimane kujika, ne twêtù baase lwendu batangile ku mbanza yetu, swaku bwa twêtù kwamba ne: “Myoyi yetu kayivwa yiteema kapyá munda mwetu pavwaYe wakula neetu mu njila apu anyi?” Bwalu tudi tulomba nunku mu Dîná dya Yesu. Amen.

<sup>18</sup> Mpindyewu ne diyiisha dilenga nunku dya butangadiki ditwapeci mu dinda emu adi, nenku mêmè mvwa ngeela meeji, nudi bamanye’s, ne, Mwaneetu Neville uvwa wakula pa didiisha dya bânà mafu amba kutaayika. Aci, s’nudi mwa kucyenza. Kadi mpindyewu, diloolo edi, tudi anu ne kaamuyiiki kakese bwa ekeleeziya. Ewu udi anu muyiiki cyanaana bwa ekeleeziya. Nenku ndi njinga kubala . . . citupa cikwabo cya Mufundu, mu Dipungila Dipyadipya, Maataayi nshapita wa 24, ku mvensa wa 35, Yesu ngudi wakula.

*Maulu ne buloba nebijimine, kadi mêtì aanyi mêmè  
kaàkujìmina to.*

<sup>19</sup> Cyena-bwalu cyanyi diloolo edi mbi—bivulukilu: *Bivùlukilu Byà Nzambi Byela Ku Mateeta À Bikondo.*

<sup>20</sup> Kadi ndi ne ndambu wa mamanyisha. Ngeela meeji ne mvwa muênzè, bwa . . . ne makwabo mwaba ewu àdì . . . pa bidi bitangila disangisha bwa kubanga ne Ebelu, nshapita 1, mu diisâtù diloolo, bu Mukalenge mwa kwanyisha. Kabingila kàdì kenza ne nciteele, ne, bu, masangisha aanyi, ndi mwa kwikala nsanganyibwa mu mwaba kampanda, kadi Yèyè umbiikila mwaba wa cyanaana. Bidi bikengela anu nye mudiYe ubiikila amu, nudi bamanye’s.

<sup>21</sup> Ke bwa cinyi mêmè ncyêna mwa kwikala bu Mwaneetu Oral Roberts ne bakwabo bàtù bàtèèka abo masangisha bidimu bibidi anyi bisatu kumpala abu, ne: “Netwikale kuntwaku,” ne balume beebe baa diitabuuja dipayame abu to. Bôbò abu—bôbò abu—bôbò abu badi ne wabo mukenji.

<sup>22</sup> Kadi wanyi Mukenji mêmè udi anu kwônso kudi Nzambi untuma aku, nansha kwikale apa, kwaka, nî mpenyi pônso. Bikengela nye anu padiYe untuma apu. Nenku mmidimu ya bwambi ibidi mishiilangane; cibì, Nzambi umwèumwè awu, Nzambi anu umwèumwè awu.

<sup>23</sup> Mvwa ngeela meeji, makeelela awu, mu muyiiki wanyi ne nsongaalume kampanda mwena mutumba. Ke yèyè kwamba ne: “Udi mumanye’s, mpaasata mukese kampanda,” yèyè ne, “yèyè’s mmuntu webe wa nkemenu.” Yèyè ne: “Ne mukajaanyi ne mêmè tuvwa basômbe bavwale pìjâmâ yetu,” ke yèyè ne, “tukaavwa twipacila pa díbà dikumi ne umwe wa bufuku, ke kulwaye

kwetu kumbelu e kukookola ku ciibi. Kwambaye ne: “Ndi mulwe kwenu eku anu bwa kunwaku neenu dikopo dya kàfê.” Nwamonu anyi? Ke yêyè ne: “Kuyaye dinsambu dya mùsèèsù, kwa mwena mutumba mukwabo, paabo bakaavwa pabwîpi ne kuya kalaala, ke yêyè kudyaye kaakâtô kaa butamu kuntwaku. Ne anu. . .” Ke pashiishe kwambaye ne: “Mmu—mmukenze kalaasa kakese kaa dilonga Bible kaa bânà, ne mmupete tuubânà tutekete twâbûngi kuntwaku, yêyè ne mukajende, mu mushindu wa ne byakakengela bwa kwelabo ntenta pambelu apu, bwa kwakidilamu bânà abu.”

<sup>24</sup> Ke mêmè kwalukila, e kubanga kudyambidila ne: “Udi mumanye’s, aci’s ncyà bushuwa. Aku, aku’s—aku’s nkalumyana kaa dikema.” Ne ndi ngeela meeji ne, Mwaneetu Fleeman ewu, ngeela meeji ne mwanende wa balume utu uya mu Ekeleeziya wa Diitabuuja dya Luther kuntweku, kalumyana kaa dikema ne mukajaaku, badi munkaci mwa kwenza mudimu munene bwa Mukalenge. Ke mêmè kwela meeji. Mêmè kubanga kusukula mashinyi aanyi, kadi mêmè—mêmè kuteketa mu maboko. Mêmè kudyambidila ne: “Mbwa cinyi bûndi mêmè ewu nciyiku mwa kwenza cyôci aci, wamonu’s, kwikala kwenda kunyunguluka, kwangata bânà bônso abu, kwikalabo benda bandonda? Mêmè ewu’s ntu munange bânà. Kadi mbwa cinyi nciyiku mwa kwikala kuya ku nzubu ne ku nzubu, ngenda ndalakana, mushindu awu?”

<sup>25</sup> Ke Cintu kampanda kungambila anu ne: “Wêwè kutu mubiikidiibwe bwa aci to. Yêyè awu udi wenza anu cidu Nzambi mumwambile.”

<sup>26</sup> Kadi bikengela twêtù kwikala ne muntu kampanda wa wimana pambelu apa, bu mudi Oral Roberts ne bakwabo, Yoshuwa kampanda mwikale ne mwele wa mvita, ne Mukenji wa diitabuuja ne disungidiibwa. Nenku, nwamonu’s, bidi bikengela twêtù kwikala ne aba badi mwa kwikala ne. . . baa mushindu awu, ne kampanda udi mwa kwikala ne *cikampanda*, kadi anu bônso baya cyapamwe bwa kwenza cisumbu cinene cimwepele. Ke Ekeleeziya wa Nzambi nyêyè awu.

<sup>27</sup> Mwawa nyiikilangana mutanci mukese ewu ne inâbânzà mutekete kampanda, mutekete mu maboko ne mwikale ne mwoyi mucibuluke. Nenku mwawa nteeta bwa kumwambila mushindu udi—udi mukaji ne mulume kabayi batapuluke to, mudibo muntu umwepele. Mulume wakenza. . . Nzambi wakenza muntu, mwikale mulume mwikale mukaji; ùvwa mmuntu. Ncyà bushuwa. Ke Yêyè kubatapulula mu mubidi ne kubenza bashiilangane, kadi kubaswikakaja pamwe bwa kwikalabo bakolesha bânà baabo balela, bu muntu umwepele. Ne pa nanku mulume, mupayame ne mukayabale, kadi mukaji udi ci—ci—citupa cya dinanga cya mulume. Pa nanku, badi pamwe. Aci’s ke. . . Nzambi kubatapulula. Kadi bavwa bubidi bwabo muntu anu yêyè umwèumwè awu, m-u-n-t-u. Ne

mukaji udi ubiikidiibwa ne mu-ka-ji, ncyá bushuwa, bwalu wakangaciibwa ku mulume. Yèyè udi citupa cya mulume. Kadi mu—mu nsòmbelu emu, mu mubidi, bavwa batapuluke. Mu nyuma, badi umwe.

<sup>28</sup> Nenku mvwa ngaakula bwa balume badi bajimija dinanga dyabo bwa bakaji baabo, ne mudibo kabacyi babananga mushindu uvwabo babanange pacivwabo bananga apu to. Bundu bwenu. Bivwa bikengela nwènù kucyenza. Mukaji udi anu munanga webe misangu yònsò. Kakuyi mpatà to. Ke citupa civwa cikengela kwikalaye ncyòci aci. Ne bivwa bikengela wèwè kwikala kumwangata mushindu awu. Kaa, kulekediku misangu nansha umwe cikondo cikese cya dizukilangana aci cijika to, bwalu dyòdi kadyakujikaku to, mu Dyulu. Nenwikale anu umwe menemene, Mwamwa naka. Ncyá bushuwa. Pa nanku bònsò . . .

<sup>29</sup> Ee, mbyenze anu bu ne bivwa bikengela bwa bamwe bakaji bàm̀bèku “amen” ku cyòci aci’s. Kanwikadiku misangu nansha umwe—musangu nansha umwe ncyùm̀vukù bya ne, “Wèwè utu anu usàm̀ina bakaji, ne wamba mushindu awu” abi to. Mwaneetu wa bakaji Hickerson, bwa cinyi wèwè kuvwaku mwambe cintu kampanda, anyi muntu kampanda paanyima pà̀àpa, wamba. . . ? Úvwa mwambè? [Mwaneetu wa bakaji Cox udi wamba ne: “Amen.”—Muf.] Twasakidila, Mwaneetu wa bakaji Cox. Abi’s mbilenga be. Mwaneetu wa balume Cox, aci’s mbwebe wèwè, nansha wèwè usanganyiibwa mwaba kaayi mpindyewu. Eyo. Eyowa’s, mukalenge.

<sup>30</sup> Nenku kabivwa bikengela twètù kupwa mwoyi bwa kutwangana mushinga muntu ne mukwende to. Ikalaayi misangu yònsò anu bena mananga. Kanulekediku aci cijika to.

<sup>31</sup> Nsongaalume kampanda wa cyena Katolike mmulwe kùndi, abidi adi panshi aa. Mukajende uvwa ujinga kutapuluka nende. Yèyè ne: “Billy, ndi ngumvwa bibi bwa kulwa kùdi wèwè; mèmè ndi mwena Katolike, kadi wèwè mwikale mwena Mishònyì.” Yèyè ne: “Nsaserdose mmungipate mu nzubu mwanyi, kukaadi katanci.”

Ke mèmè ne: “Bwalu budi cinyi, Ham?”

<sup>32</sup> Yèyè ne: “Ee, yèyè’s wangambidi.” Yèyè ne: “Ntu nnwaku ndambu wa twalà,” ke yèyè ne, “mèbà a diloolo awu, ntu ngenza mudimu mukole.” Yèyè ne: “Mukajaanyi udi yèyè wela meeji ne bivwa bikengela ngiikale ngaalukila kumbelu diloolo dyònsò mmutwa mishiku, ne mmuupukila, ne ngenza maalu anu mushindu utuvwa twenza patucivwa tudilongolola bwa kuselangana apu awu.” Yèyè ne: “Tudi baselangane ne balele musumba wa b̀anà.” Ke yèyè ne: “Twètù, aci’s ncikondo . . .”

<sup>33</sup> Mèmè ne: “Kakaa, indilabi kakese t̀ung, nsongaalume. Wèwè ngudi’s mupiile. Wèwè ngudi mupiile. S’bidi anu bu munuvwa kumpala kwa nwènù kuselangana amu. Wamonu anyi? Udi ne cya kwikala misangu yònsò anu ubivuluka.” Mèmè ne: “Yèyè

nyawu ne bidimu makumi anaayi mpindyewu, dîbà diine didiye bulelela ne dijinga dya ntema yebe.”

34 Pa nanku, bakaavwa ku tubàdì twa kushipa kwa mabaka. Ke yêyè ne: “Ncyèna mumanye cîngènà to.”

35 Mêmè ne: “Ndaaku, ukamubiikile. Bu mêmè mwa kupatuka kuya kuntwaku, mêmè bu mwena Mishòonyì, kî mmufwanyine kungaakidila to. Kadi ndi. . . Wamonu anyi?”

Yêyè ne: “Kaa, yêyè’s utu mukuswe wêwè.”

36 Ke mêmè ne: “Bwa aci, ndaaku anu ukamubiikile, umwambile ne wâshintûlûlû meeji auvwa naawu awu.”

37 Nanku dituku dyâkalondà adi, mvwa mubiikile nzuji muyiikile nende. Ke mêmè kwambila nsongaalume mwine ewu, kwamba ne: “Mêmè nêngîkalè musòmbèle anu mwinshi mwa nzubu wa kuulu mwikalâ nzuji munkaci mwa kunuyoobeshila ne nkonko amu. Nêngîkalè munkaci mwa kunusambidila. Kwambidi mukajeebe ciine aci to.”

“Eyo.”

38 Pa nanku, mvwa nsanganyibwa mwinshi amu, mwikale nsambila. Paanyima paa katanci mêmè kuumvwa tuumikuma twa makàsà twenda tupweka ne cibandilu, kadi’s ke bôbò bâlwalwà aba, beelangane maboko, bônsò anu ne mimwemwe mimonangane, nudi bamanye’s. Yêyè kwamba ne. . . Mêmè kwamba ne: “Ee, beetwabu, kuntwaku!”

39 Ke yêyè ne: “Mwaneetu Branham, kwênjì ntanta’s kacya ngâkumòna!” Eyo, tusunsa makumi asatu, nwamonu’s. “Ntanta kacya ngâkumòna!”

40 Ke mukaji ne: “Mona’s, Révérend Branham, ncyèna mukumoneku to kukaadi ntanta mule! Ndi ne disanka dya kukumona cyakabidi’s!”

41 Mêmè ne: “Twasakidilaayi. Mona’s,” mêmè ne, “nudi numweka anu bu beena mananga’s.”

“Kaa,” ke yêyè awu, “s’tudi anu bilenga’s. Kî mmwômò anyi, munanga wanyi?”

Mukaji ne: “Eyowa’s, s’tudi bilenga, munanga wanyi.” Ke mêmè. . . Mukaji ne: “Wâlwa kutumonaku musangu kampanda’s, Révérend.”

42 Ke mêmè ne: “Twasakidilaayi, wa manza tente.” Mêmè ne: “Nwâyaayi bilenga, kwenu aku!” Kuyabo, nsongaalume mukulumpe awu ukudimuka nunku e kunkupaye pende cyanza, nunku ewu. Byònsò kwenzeka’s. Ncyà bushuwa.

43 Dinanga ditu dicimuna byònsò. Ncyà bushuwa, anu—anu dinanga pa dinanga. Nudi mwa kwikala ne bimanyinu ne bileeeji byenu byònsò abi, kadi mpeeshaayi mêmè anu dinanga. Aci—aci ncidi cikosa bwalu, bwanyi mêmè. Kaa, ekelekele!

Mwânà wa mukooko munanga udi upùnga ne  
 lufu, Mashi Ebe a musinga mukole awu  
 Kaàdyàkujìmijakù bukole bwaWu to,  
 Too ne piikala Ekeleeziya yònsò mupikula wa  
 Nzambi awu  
 Musungidiibwe, bwa kacyiku mwa kwenza  
 kabidi mpekaatu to. (Nwamonu anyi?)  
 Kubangila anu pângààkamònà ku diitabuuja  
 musulu awu  
 Udi mputa Yebe yidi yizololoka mashi yifila,  
 Dinanga dipikudi ndikaadi dishaale cyanyi  
 cyena-bwalu,  
 Ne nedishaale nanku too ne pângààfwà.

Aci's ncyà bushuwa. Kaa, bilenga be!

<sup>44</sup> Mpindyewu, bivulukilu byela ku mateeta a bikondo! Kùndì mupetele cingenyinyenyi eci mu dinda emu, kuvwa nku diyiisha dyetu dya mu kalaasa kaa Dyalumingu adi, diyiisha dya butangadiki, muvwa mwaneetu wakula bwa Eliya. Muvwaye ukeba ku- . . . Bânà baa balume aba, bilongelu bya baprofeta ebi, mushindu mwine uvwabo bakeba kwibaka cilongelu cinene cya mushindu kampanda's. Ke kundwilaci mu meeji, nenku mwya ngeelangana meeji pa bitudi tucinka ne "mbivulukilu" abi.

<sup>45</sup> Mpindyewu, civulukilu ncintu cinene. Tudi twanyisha bivulukilu. Ne bantu bààbùngì, mu mwoyi wa panwapa ewu, bakaadi bateete kushiyaku civulukilu cya mushindu kampanda paanyima paabo. Bantu pamwe ne bônso batu banange kwenza ciine aci. Kuteeka ku nkita yabo, cimanyinu cinene. Aci's cidi anu cilenga. Bushuwa. Mémè ntu mwanyishe ciine aci. Aci's—aci's ncilenga. Ne pashiishe bààbùngì batu bateeta kwibaka myaba minsantu minene ya diya kabandila.

<sup>46</sup> Civulukilu cimwepele cîndi njinga kuteela mpindyewu, cidi mmu Ohio, nenku kuvwa mwena dyabulu kampanda. Dînà dyende dyämpù mwoyi. Ndi ne fòtò awu mu mwaba kampanda mu mukanda wanyi wa dilamina maafòtò mwamwa kwanyi kumbelu. Byenze ne, yèyè awu uvwa ubengangana ne bwena Kilisto wosha ne munu mwîkù, mu mushindu wa ne wakajinga bwa kumwashilabo civulukilu cyende yèyè, paanyima paa lufu lwende, mwikale mudyate dikàsà pa Bible, ufunkuna munu panshi mushindu ewu, wamba ne: "Ngumukilaayi apa ne miitabuuja a majimbu a ntendeleelu awu, kadi maalu a mamanya a cyena leelu ôwò abandishiibwe kuulu." Kadi pakaavwaye upùnga ne lufu, kwambaye ne: "Piikalabi ne mémè ndi mupiile, nyoka neyiikale yenda yidikoka yipatuka mu majambu aanyi." Kadi paakafwaye, bacivwa anu beela malaba ne cikasù mu majambu ende kadi kushipabo nyoka ya ntooka minene ibidi anyi isatu. Ne leelu ewu, mu nkita ayi, mwambi mukwabo mmukakwatemu fòtò anu abidi adi



panshi aa ne mulwe nende bwa kundeeja, ne minyoololo yivwa milebelele minyungulukile kaaba kende aku. . . Nkita ayi mmwaba mulenga wa dikema, kadi cibùndù cyende yêyê cya malaba cidi anu cibùndù cya nyoka. Ne nansha bya munyi, nansha babwele mu movù wa mabeji apoopoka anyi movù wa mashika, nyoka yicidi anu yipatuka yenda yidikoka mu majambu ende yêyê amu. Civulukilu's! Nzambi kiitabiku bwa mêmè kwikala ne civulukilu cya bu nanku to, anyi nî nganyi nî nganyi wa kunudi.

Kadi kudi bivulukilu, nansha nanku, bivulukilu binene.

<sup>47</sup> Ndi mvuluka Yoshuwa, mulwanganyi wa mvita wa bukole. Mushindu mwine uvwaye muntu munene, wâkangata bya mvita bya Mòsà, bu mulombodi wa miliyô ibidi ya beena Yuda eyi. Mòsà, bwikale muntu uvwa musobola, mubiikila bwa kupatuka, mutapulula bwa mudimu. Ne Yoshuwa bwa kubwela ne kwangata kaaba kaa muntu awu, civwa bulelela cintu cinene cya dyenza, bwa kukumbanangana pa kaaba kaa muprofeta ewu. Mulwanganyi wa mvita wa bukole, mubiikila, mudyanjila kulongolola ne muteeka kudi Nzambi. Bidimu nkama inaayi kumpala mene kwa yêyê mwine ewu kulwaye, Nzambi ukaavwa mwambe ne Yêyê neabasungile ne Neabamwenekele. Kadi mushindu mwine uvwa Mòsà mulwanganyi wa mvita's we!

<sup>48</sup> Kacya muntu nansha umwe kavwaku mwangate bisabaata bya Mòsà to, bwa kukumbananganamu, too ne paakalwa Yesu Kilisto kukumbana mwa kucyenza. Ne wakamba, yêyê mwine ne: "Mukalenge Nzambi webe neajuule Muprofeta munkaci mwebe, mufwanangane naanyi. Kadi nebyenzeke ne, wêwê kuyi muswe kuteeleja Muprofeta awu, yònsò wabenga kuteeleja Muprofeta awu neumushiibwe." Eyo.

Mpindyewu, civulukilu cinene eci.

<sup>49</sup> Nenuku Yoshuwa ukaavwa mupweke too ne ku musulu. Ne paanyima paa Mòsà mumane kufwa, Yoshuwa wakangata kaaba kende. Ne Nzambi uvwa ne Yoshuwa. Ke kwambaye ne: "Mpindyewu dijidilaayi, sukulaayi bilàmbà byenu, ne nushaale ku luseke, ne kanufiki padi bakaji beenu to. Nenuku mu dituku diisâtù, Nzambi neenzè cintu kampanda." Kaa, mêmè. . .

<sup>50</sup> Dimwe dya ku maloolo adi panshi aa, mu masangisha a mu dyalumingu, ndi muswe kuyiisha pa "dituku diisâtù" adi, bwa kunuleeja ne mbukole kaayi bùdìmu, isatu ayi. Ndi muciteele mu dinda emu, mu disambila; muntu ne muntu uvwa ne bintu bisatu, ne malu a nomba a Bible.

<sup>51</sup> "Mpindyewu, mu dituku diisâtù nenumone butumbi bwa Nzambi." Mpindyewu bidi bileeja. . . bivwa bileeja ne yêyê uvwa mumanye ne ditwishiibwa dyònsò civwaye wamba aci, bwalu wakamba anu menemene cikondo civwa bwalu abu ne cya kwenzeka. Nenuku mêmè ndi mwa kudifwanyikijila mushindu wàkadyùmvwà Yoshuwa, paakiimanaye mwaba awu kumpala

kwa beena Izaleela bônso abu apu. Mpindyewu, dîyî dyende divwa ne cya kwikala dilelela. Kadi Yadene pende nyawu uvwa mwaba awu mûle ne mu malenge.

<sup>52</sup> Nudi numona's, ngiikadilu wa muntu utu umanyikila ku byenzedi byende. Cyônso cyûdi wêwè, byenzedi byebe mbidi bijaadika cyûdi. Nansha wêwè ufila majaadiki bûngî munyi, nansha wamba binganyi, bya witaba anyi bya ubenga, aci kaciyena ne dipetangana ne bwalu bwine to. Byenzedi byebe mbidi byamba cyûdi, byamba cyûdi munda mwebe amu. Mudimu wônso wûdi ukwata, ke udi umwenesha cyûdi.

<sup>53</sup> Ne nwênù beena kantu-ku-byanza, nwênù nwenza mudimu mwikale anu wa prâtâprâtâ, ikalaayi bumvwe cîndî njinga kwamba aci, mudimu anu mulekeela mu njila, kanwenji aci to. Pawikala kuyi mwa kuwenza bîmpè menemene to, kùwénji mene to. Ncya bushuwa.

<sup>54</sup> Paudi ulwa kudi Kilisto, pawikala kuyi mwa kudilekelela wêwè yônso anu cya bushuwa menemene, ne kasuki, ne byônso, too ne ku muji, kadi kulwa kudi Kilisto, kulu wêwè mwine to. Kadi paudi ujinga bulelela kwikala mwena Kilisto, patukila patooke. Uciwije cilelela. Ke cyôci aci cidî Nzambi muswe bwa wêwè kwikala. Ne cyôci aci—cyôci aci ke cyajaadika, byenzedi byebe ke byajaadika cidî ngiikadilu webe. Ngiikadilu webe udi umanyikila ku byenzedi byûdi wenza.

<sup>55</sup> Nenku Yoshuwa, mpindyewu, dîyî dyende divwa ku diteeta; eyowa's, mukalenge, anu bu—bu dya Noa wa kale awu. Kadi Yoshuwa uvwa ne cya kusabuka musulu ewu. Kadi kumwekabi anu bu ne wakasungula cikondo citambe bubi cya muntu kayiku mufwanyine kwelela meeji to. Civa mmu ngondo mwinâyî. Ne dîbâ adi paadi's ke ditu nêjè wengulukila mu Yudaaya, ne upwekela pa mikuna, ne Yadene wa kale awu mûle tente ne bitoci, ne mupaasalale too ne—too ne mu madimi, bwa kwikalabo bamyamina mâyi mu madimi a ku Yadene aku. Nenku byakamweka bu ne, bu byôbî biikale bya dyanza dya makumi, anyi—anyi bya tulaasa tulonga, anyi bya maalu a mamanya, yêyè—yêyè wakasungula cikondo civa citambe bubi cya cidimu cijima aci bwa kusabuka Yadene. Kadi Nzambi utu muswe kwangata bikondo bya mushindu awu bwa kujaadika ne Yêyè udi Nzambi.

<sup>56</sup> Nenku balume baa Nzambi, bàdî biitabuujà Nzambi ne bamanye cidî Nzambi mulaye, kabatu baciina bwa kucyenza to, bwalu Nzambi neashaale anu kacya walamata ku Dîyî Dyende, anu mudibi bulelela ne Yêyè udi Nzambi.

<sup>57</sup> Nenku paakambaye ne: “Dyambedi, nwênù angataayi musheete wa cipungîdi nuye kumpala.” Nenku makàsà a baakwidi abu mmenze anu alenga Yâdene, nansha muvwaye ne lwonji, ne muvwaye mûle tente ne mu malenge amu, wakashiila Dîyî dya Cyendelelele dya Nzambi mwaba, bwalu

Dîyî divwa mu musheete wa cipungidi amu. Mpindyewu, Yesu wakamba ne: “Maulu ne buloba nebijimine, kadi Dîyî Dyanyi kadyakujiminaku to.” Pa nanku, Yoshuwa, bu muvwaye mumanye ne dîyî dyende yêyè divwa ne cya kwikala dishindameene pa Dîyî dya Nzambi, ke kuteekaye Dîyî dya Nzambi kumpala.

<sup>58</sup> Ndi njinga bwa nwênù babeedi badi kaaba aka diloolo edi aba nwênzè cyôci aci, uteeke Dîyî dya Nzambi pamwe ne ditonda dyebe. Teeka ditonda dyebe, udiitabuuja ne udyèla patooke apu; ne ubiikila bintu, bidi kabiyiku abi, bu ne bidiku. Pashiishe netutungunuke ne lwendu. Ucyênzè mu mushindu awu. Dîyî dya Nzambi nedikafikishe ditonda adi too ne kundekeelu.

<sup>59</sup> Nenu makàsà a baakwidi mmenze anu alenga Yadene, ke yêyè kudisaka anu paanyima, byangacile anu ku luseke too ne ku luseke lukwabo. Ke mâyi kushaalawu miimane kaaba kamwe.

<sup>60</sup> Nudiku nufika ku dyumvwa anyi? Dikungula dya musulu awu nunku’s mmungwiye mushiki wa mâyi lwà ku mwelelu aku, munda mwa tusunsa makumi abidi, mufwanyine kwikala bunene bu—bu bwa yimwe ya ku nkila minene ya cyena leelu yitudi naayi eyi, ne Nkila wa Colorado Boulder udi kuntu kwaka wawa. Mushindu mwine utu Yadene awu upwekelamu ne kavumu, upatukila mu mikuna, ne bukole bwa njajama, ne upwekela mu bibandabanda amu ne kavumu’s.

<sup>61</sup> Nenu padi bendi baa lwà makàsà miliyô ibidi, biikale ne bakaji ne bânà, bûngi nanku, pâmwâpa byakabangata mêbà anaayi anyi ataanu, anyi mapite apu. Kadi nudi nwela meeji kaayi? Musulu awu’s nunku mmûle tente. Kadi, Nzambi ngwâkiimanyika musulu awu. Amen. Kaa, ndi munange aci’s. Wakiimanyika misulu! Ke wôwò kwimana mwaba awu too ne paakasabukabo.

<sup>62</sup> Pashiishe Nzambi kwambila Yoshuwa ne: “Tudi baswe kwenza civulukilu cya cyôci eci. Patuka kwaka utume mwena Izaleela yônsò, umwe ku cisamba ne cisamba, bangule mabwe dikumi ne abidi bwa bânzè civulukilu. Nenu civulukilu eci neciikale cya ne piikala bânà beenu balela bapicila mu njila ewu, nebakonke ne: ‘Cidi cyenze bwa mabwe aa kwikalawu kaaba aka ncinyi?’ Nenu nenubalondele bwalu bwa muvwa Nzambi mwimanyike Yadene.” Aci’s ncivulukilu cilenga cya dikema. Dîngà dituku ndi ne ditekemena dya kuya kabandilaku miine mabwe awu, mu matuku makese acilwalwà aa, mwaba udiwu mashaale miimane bu civulukilu awu. Kadi pashiishe nyewu mvuluka—civulukilu cikwabo... Civwa ncivulukilu cinene cibeneshiibwe kaayipu’s we!

<sup>63</sup> Pashiishe ndi mvuluka civulukilu cikwabu, dîngà dituku, paakenza mukaji kampanda disungula dibi. Wakangata dipangadika dya kubenga kushaala mu bibandabanda bivwa mvula yimatamu bîmpè bya—bya, anyi, dya kushaala mu

bibandabanda bivwa mvula yimatamu bîmpè bya Sodoma ne Gomola, bwa kwikalaye mumanye disòmba ne bakwende ne kwikala ne nsòmbelu mufwanangane ne wa bakaji bavwa mu miine matuku awu abu.

<sup>64</sup> Yèyè kaakenza disungula dîmpè to, bu muvwa Sarah wâkashâàla ku mikuna mu malaba avwa kaayi ne bufuke awu. Cibi, yèyè wakalama Dîyi dya Nzambi mu mwoyi wende. Ne yèyè uvwa utumikila ne udileeja wa musangeelu kudi bayende, mu mushindu wa ne wakamubiikila “mukalenge” wende. Nenku ke kwôkò aku kwakatuuluka Nzambi ne Banjelo babidi ne kubamwenekela mu ntenta.

<sup>65</sup> Kadi, Mandamu Lota yèyè, kushaалаye wa ngiikadilu wa pa buloba bikole ne mwangacike ku maalu a pa buloba. Kadi ndileesona kaayi didi cyôci aci kutudi, leelu ewu, dya ne twètù tudi mwa kushaala batambe kwikala baa meeji a maalu a pa buloba. Ne mêmè ndi mutwishiibwe menemene ne, leelu ewu, ekeleeziya, mu kaabujima, udi wenda utamba kushaala wa meeji a maalu a pa buloba bikole. Mpindyewu, pàmwâpa, Mandamu Lota mwine awu kavwa anu ne meeji a kwenza cyôci aci to, paakapwekaye mwine amu apu. Yèyè wakadyambidila anu ne: “Nèngiikale anu mumanye disòmba ne bakwanyi cyanaana.” Kwikala mumanye disòmba ne bakwebe’s kutu anu kwîmpè, kadi wâmanya’s kwikadi wâlonda biibidilu bya pa buloba.

<sup>66</sup> Pawaya, wâya bu Shadraka, Meshaka, ne Abednego, ne Danye. Bôbò baakadipangadikila munda mwa myoyi yabo bwa kubenga kudikooyisha, nansha bibande nansha bipweke. Nansha bakwabo baa mu ekeleeziya batwe cimpingà, nansha cinyi cyenzeke, bôbò baakadipangadikila munda mwa myoyi yabo. Ne bôbò badi civulukilu patudi twakulangana apa.

<sup>67</sup> Ne Mandamu Lota yèyè mmushaale bu civulukilu. Nenku paakamupa Nzambi mukenji wende wa ndekeelu wa ngâsâ, paakatumaYe Banjelo abu muntwamu ne kubambilabo ne munda mwa mêmè makese Sodoma ne Gomola bivwa ne cya kwoshiibwa. Nansha nanku, yèyè kaakatwalaku meeji a kulekela nsòmbelu wende wa luumu awu to, bwa kupatuka kubwela mu cipeela, ne kwikalaye ne nsòmbelu wa bwena uvwa nende Sarah mu cipeela mwamwa awu, ne kwikalaye ne cya kuvwala bilâmbâ byetu bya patupu ebi, bya bishaadile bya mukaji wa mu cibandabanda abi to. Yèyè uvwa muswe kwikala mu mvwadilu ne ndiilu bya mushinga mukole. Bayende ukaavwa mushaale muntu munene mu cimenga amu. Uvwa musòmbèle mu ciibi cya cimenga, bu nzuji anyi mulombodi wa cimenga. Nenku uvwa yèyè munange mvwadilu ne ndiilu bya mushinga mukole abi. Ne kavwaku mwa kutwala meeji a ne bivwa bikengela kulekela bintu abi to. Nenku paakapatukaye ne bayende, pambelu paa cimenga, uvwa anu wenza kutangila paanyima, udila mwadi ne ubungama bwalu bivwa bikengela yèyè kubilekela, kutapuluka ne lufu lwa mushindu awu alu.

68 Yesu wakamba ne: “Ewu udi uteeka cyanza ku ditempu dya nkasu, kadi ukudimuka bwa kutangila paanyima, awu kî mmukumbanyine kudima ne ditempu dya nkasu to.” Bivwa bikengela twètù kwikala bantu baa mushindu kaayi? Ewu udi uteeka cyanza ku ditempu dya nkasu, nansha mene kayi—kayi mukudimuke paanyima to, kadi ukudimuka anu cyanaana bwa kutangila paanyima, kî mmukumbanyine nansha kudima ne ditempu dya nkasu to. Kaa, s’bivwa bikengela twètù kwikala balame mèsù etu ne myoyi yetu pa cintu cimwepele. Bidi bantu bakwabo benza nansha biikale binganyi, bidi ekeleeziya wenza, bidi mwena mutumba wenza, bìdì nî nganyi nî nganyi mukwabo wenza, lama mwoyi webe mushindameene pa Kalvariyo. Kwimanyi nansha bwa kutangila paanyima to. Katwena ne dibà nansha dikese dya kutangila paanyima to.

69 Kadi mukaji ewu, bwalu wakenza nanku, Nzambi kufilaye civulukilu kudi bantu bônso badi bakudimuka bwa kutangila paanyima, paanyima paa bamane kwitaba Kilisto bu Musungidi wabo sungansunga. Wakandamuka e kushaala dikunji dya mukele. Ne mmushaale mwimane mwaba awu too ne leelu wa Ndaaya ewu, didi mwa kumweneka mu madimi ne, mmukaji udi mwimane wawa ne mutu wende mukùdimuna, utangila paanyima. Nanku mmutangidile pa dikaaya dyende dya dyabakaji, bwa kutangila paanyima mu madimi. Wende mwoyi uvwa paanyima apu. Nansha nanku, uvwa bu mwenzejibwa ku bukole, bwa kwenza cyôci eci.

70 Ne bantu bààbûngì badi bangata Kilisto mushindu awu, leelu ewu, bwalu badi bapatuka mu maalu a pa buloba, badyumvwa bu ne mbenzejiibwe ku bukole bwa kucyenza. Nanku badi anu batungunuka ne kujinga ne kwalakana, nanku abidi mmale asatu mmîpì badi baalukilamu. Nanku bôbò abu badi—badi bivulukilu bya ngàsà wa Nzambi bìdì bikwàcishà bwôwà, bya dinanga dya Nzambi dyakalejiibwa kudibo. Mpindyewu, bivulukilu’s!

71 Mpindyewu, mu matuku a Yesu, pa buloba, beena Yuda bavwa biibake ntempelu bu civulukilu. Nanku bôbò kuleeja Yesu mushindu uvwa ntempelu awu mwibakiibwe bilenga bya kacya. Kadi Yêyè wakamba... Byakakengela bidimu makumi anaayi bwa kwibaka ntempelu awu; bidimu bitwe ku makumi mwandamukulu, byônso bisanga. Munda mwa bidimu makumi anaayi, bavwa basonga mabwe mu bitupa bishiileshiilangane bya buloba. Bidimu makumi anaayi mu dimwibaka, kakuyiku nansha mwadi wa scie anyi mukuma wa nsandu to.

72 Kadi, nudi bamanye’s, nansha Yesu mwine wakamba mwaba awu ne: “Kanutangidiku ciine eci to, bwalu Mémè ndi nzwambila ne, nekulwe cikondo ciikalaku kakuyi kushaala dibwe nansha dimwepele pamutu paa dikwabo to, dibwe dimwepele pamutu paa dikwabo.”

<sup>73</sup> Kumpala menemene aku, Yèyè wakamba Mèyì manene a civulukilu aa ne: “Maulu ne buloba nebijimine, ntempelu neyijimine, bivulukilu nebijimine, kadi Dîyì Dyanyi ke civulukilu cya kashidi.”

<sup>74</sup> Musheete wa cipungidi ukaadi mubole, kukaadi bidimu. Nkita ya baprofeta yikaadi myupuke. Ne bivulukilu byônsò bishiileshiiilangane bikaadi bidinyangukile, ne bikondo bya dikulakaja, bikaadi bipulumune ne dibwe diine. Kadi Dîyì dya Nzambi ndishaale anu mwàdi ne kale, dilenga dya dikema kashidi ne kashidi. Didi anu ne mwoyi ne citaleela diloolo edi, bwa beena kwitabuujja baa dituku edi, anu muvwadi mu matuku akaakudiibwadi awu.

<sup>75</sup> Kabyena bikemesha to bwa ne, Eliya, mu dinda emu, mu dyetu. . . diyiisha didi mwaneetu mutuyiishe edi. Paakaswabo kwibaka cilongelu cinene bwa baprofeta, bu civulukilu, kadi Eliya yèyè wakasungula cintu citambe bwîmpè, cishima cya Nzambi bwa kujuula cyamu civwa cipone bwa kucilelemija pa mâyì. Civwa n’Dîyì dya Mukalenge.

<sup>76</sup> Kadi udi mutambe kwimpika, diloolo edi, ng’ewu udi wakidila Dîyì dya Mukalenge, munda mwa mwoyi wende, bu civulukilu, kutamba aba badi bafwanyine kuteeta kwibaka civulukilu kampanda cya cinene.

<sup>77</sup> Anu abidi adi panshi aa, pâmvwà muumvwe, pâmvwà mu Italie, mêmè kuumvwa bamba bwa Mussolini, ne lupingu lunene lwa butumbuke bwa makàsà makumi anaayi [m 12] ne bya mu njila alu, lwakiibakishaye bu civulukilu cya benji baa manayi a dipiiyangana, bu muvwaye mwenji wa manayi a dipiiyangana. Nenu mvwa muswe kuya kamona civulukilu aci. Kadi, nudi bamanye’s, cikaavwa civwijiibwe tvinguvingu kudi bombe munene wa bujitu.

<sup>78</sup> Mvwa mwimane, kukaadi bidimu bu bibidi, anyi bisatu, pa mwaba uvwa baapâlò baa Ejipitu biibake myaba minsantu minene ya dilwa kubandila ne mpingu awu. Nenu mêmè. . . Badi bangambila ne mbifwanyine kukengela bwa kuumbula too ne mu makàsà makumi abidi [m 6] mwinshi mwa buloba, bwa kupetaku nansha buloba bwine buvwa bivulukilu abi biimanyine.

<sup>79</sup> Mvwa mwimane mwaba uvwa César Auguste, mwaba uvwa ba-Heloode ne banene baa Loomo abu. Ke mêmè kulonda mùsèsù kampanda, ne kuvwaye upwekela ne mùsèsù pavwaye uumukila ku nzubu wa bukalenge aku, kadi cidi mu makàsà makumi abidi ne ataano [m 6,6] mwinshi mwa buloba. Bivulukilu abi biyilè.

<sup>80</sup> Kadi Dîyì didi ne mwoyi dya Nzambi adi dicidi dishaale anu mwàdi ne kale kabidi diikale anu ne mushinga wadi awu. Aci’s ncivulukilu.

<sup>81</sup> Pa nanku ndi ngamba, leelu ewu, mwaneetu, ne bintu byûdi wenza, mêtî audi wamba, mushindu wûdi wenza mwena mutumba neebe awu, ne cyûdi wenza bwa Kilisto aci, neciikale civulukilu cya kashidi. Udi mufwanyine kwikala ne nzubu mulenga wa kushiila bâna beebe. Udi mufwanyine kwikala ulaabuluka bwa kupeta byakudya, bya kushiila bâna beebe. Kadi mbipiciibwe ne mêmè mubashiile Dîyî dya Nzambi pamutu paa nî ncinyi nî ncinyi cikwabo cyônso. Nzubu ayi neyijimine. Aci cidi anu cîmpè menemene, mbwalu bwîmpè. Ncyêna naaci cilumbu to. Kadi kwikadi wênza tuntu twa tunyiitunyi atu kadi washiya bintu binene kabiyi byenza to, udi umona's. Bwalu, Dîyî nediiikale. . . Nzubu's neabutuke, ne bantu nebibutuke pamwe nende. Kadi Dîyî dya Nzambi nedibabiishe ku lufu mu matuku a ndekeelu, ne nedibape Mwoyi wa Cyendelelee ne udi kawuyi ufwa kabidi to. Nenu, mpindyewu, bwa kushiya bumpyanyi bwa mushindu ewu, Dîyî dya Cyendelelee dya Nzambi!

<sup>82</sup> Nyewu mvuluka musambu wa kale ewu utuvwa ne ciibidilu cya kwimbimba kaaba aka, kukaadi bidimu ne:

Bikondo mbyûle ne dishintuluka dya  
cîmpicîmpi,  
Cintu cya pa buloba nansha cimwe  
kacyakushaalaku cishimate to,  
Ibakila ditekemena dyebe pa bintu bya  
Cyendelelee,  
Ikala mukwate ku cyanza cya Nzambi cidi  
kaciya cishintuluka!

Piikala lwetu lwetu lujike,  
Byôbi ne tuvwa ne lulamatu kudi Nzambi,  
Cisombelu cyetu cilenga ne cya cibalakana cya  
mu Butumbi aci,  
Musuuka wetu mwambwibwe neukacimone.

<sup>83</sup> Mushindu mwine udibi bitambe bulenga bwa kutangila pambelu, mpala ne mpala ne dibwela dya dîbà, pakaadi mijilu yebe yibanga kutalala mu mubidi webe, pakaadi bâna beebe biimane ku nyungulukilu wa bulaalu, bwa kumanya ne ukaadi mwibakisheku civulukilu, ne: "Munanga wanyi, dîngà dituku papa neatuutakeene neenu dyamwamwa!" Mbipiciibwe ne mêmè mwikale ne cyôci aci.

<sup>84</sup> Padi ngangabuka mwambe ne: "Billy, kakucyena cintu cikwabo cîndi mwa kwenza bwebe wêwê to."

<sup>85</sup> Kadi mêmè mmona bâna baanyi, mbatwa mishiku ya kulayangana naabo. Ngamba ne: "Kadi papa kâna ufwa to. Uyaaya ku diikisha, mu Mwaba kampanda. 'Bwalu piikala tabernacle wa buloba ewu munyanguke, nkaadi ne mukwabo mwindile.'" Civulukilu kaayi cya kwambilangana's we! Mbipiciibwe ne mêmè mwenze aci, mutangilangane ne bâna baanyi mpala ne mpala, pamutu paa kwamba ne: "Munanga

wanyi, ndi ne ndola mùliyô mujima mu *ewu* banki, ne mùliyô mujima mu *ewu ewu*, bwenu nwênù.” Mbipiciibwe ne mêmè mushiye bujaadiki abu.

Pa ditapuluka, kushiya paanyima peetu  
 Bidyacilu bya makàsà pa lusenga lwa bikondo;  
 Bidyacilu bya makàsà, bìikalà pàmwäpa  
 mukwabo,  
 Wendela mu mazuwa pa mbû wa kayi tuseku  
 wa mwoyi wa panwapa,  
 Bwa mwaneetu udi kaciyi pabwasa ne mupete  
 njiwu,  
 Paamonaye, wapetululaku bukole.

Kakuyi mpatà to! Ûbishiyè bu bivulukilu, majaaniki ebe awu.

<sup>86</sup> Mushindu mwine wûndi mvuluka, diloolo edi, mukulumpe kampanda udi usanganyiibwa dyamwamwa, mu mēbà ende a ndekeelu a mwoyi ewu, mumbiikile dituku kampanda bwa ngāyiisha ku citalu cyende; Tabernacle wa Paul Rader. Yēyè awu mmulunda wanyi mwîmpè, F. F. Bosworth, munsantu wa difwana dya Nzambi mwikale uya bwa katuutakeena ne Mufuki wende. Ke yēyè kwamba ne: “Bwa edi dībà ke didi ditambe kwikala dya disanka dya mu nsòmbelu wanyi, Mwaneetu Branham.” Yēyè ne: “Ndi ne disanka dinene dya kumanya ne nkaadi nya bwa katuutakeena Nende, mbinkolele mene ne bwa kumona tulu twetu twa bushuwa etu bufuku.”

<sup>87</sup> Mvwa muumvwe bwalu bwa Mandamu Aimée McPherson; kî nkumudyombola to, mmukaji mwîmpè wa dikema. Ntu mmona matoba mu *cikampanda* ne mu *cikansanga*. Ntu mmona matoba pa Smith Wigglesworth ne Docteur Price, ne pa bantu banene bààbûngi abu, kadi kakuyi ditoba nansha dimwe dînkadiku mumvwe muntu nansha umwe wamba bwa F. F. Bosworth to. Nzambi, enzaku bwa wanyi ndekeelu ikale mushindu awu, civulukilu cya ngàsà wa Mukalenge Yesu Kilisto!

<sup>88</sup> Ndi mvuluka E. Howard Cadle kuntweku, anu abidi adi panshi aa, pavwaye ukaadi mulaadile panshi, bu kanwayi, ne—ne njiji yimwikila ne mukana. Kadi maman wende mukulakaji munanga kuntwaku ukaavwa musambile ne mwithabuuje, ne mushaale mukwate Nzambi, bwa mwanende wa balume mukwaciki wa maluvu awu. Mwaba awu, paakashiyanganaye ne buloba, wakashiya bujaadiki ne civulukilu cya ngàsà wa Nzambi wa Bukole bwònsò udi mukumbane awu. Padibo baMuteekela Dîyi dya Nzambi, mu disambila, Nzambi mmwenzejiibwe bwa kwandamuna bwa bwalu abu.

<sup>89</sup> Nzambi udi munkaci mwa kwibaka Ekeleeziya bu civulukilu, civulukilu mulambu Wende. Kilisto kaakalwa pa buloba bwa kufwa anu nanku cyanaana to. Lufu Lwende kalwakwikala anu bwa cyanaana to. “Nzambi udi ne bukole



bwa ku mabwe aa kujuudila Abraham bânà.” Padi bantu kabayi baswe kuCileeya mu nsòmbelu, padibo bôbò, kabayi baswe kuCyangata ne mushinga, ne kabayi bafika ku dyumvwa ne ndipà kaayi dinene didi Nzambi mubape to, Nzambi udi ne bukole bwa ku mabwe kujuudila Abraham bânà. Ncya bushuwa ne Yêyè neàcyènzè! Ne pândi nkwèlèla meeji, ne ngeela meeji ne mmushinga bunene kaayi wakakengelabi bwa Yêyè kufuta’s! Mpindyewu cimpè. . .

<sup>90</sup> Muntu wetu yònsò ewu utu muswe yêyè bwa apete bintu byònsò anu cyanaana, muswe byònsò...Ke mushindu wa nsòmbelu wa cyena Amerike ngwôwò awu leelu ewu. Kupeta byònsò byûdi mwa kupeta abi anu cyanaana. Mwaneetu, kwèna upetaku cintu nansha cimwe cya mushinga eci, anu cyanaana to. Udi utuula mushinga bwa cyûdi upeta. Ncya bushuwa. Bikengela wèwè ucifucile mushinga, nenku cidi cilwa cya mushinga mukole.

<sup>91</sup> Ne lupandu lwebe ludi lulwa lwa mushinga mukole, bwa Nzambi. Bidi biyiila mushinga wa Mwan’Ende umwepele mulela, bwa kufila Mwoyi wa Cyendeleele kudi muntu ne muntu ne kumuvwija wa disanka, diloolo edi, ne bwa kwikalaye ne mwoyi bwa bintu bidi bikumbanyine kwikadila ne mwoyi. Kabiyi bwa kushiila bânà beetu balela cintu kampanda nansha; kakwena bumpanyi nansha bumwe bwa kushiilangana, bunene bupite lupandu lwa kudi Mukalenge wetu Yesu to. Ncya bushuwa ne, kabwenaku to.

<sup>92</sup> Mpindyewu, mishinga minene yitu mifuta. Dyela dya ku mateeta a bikondo didi ne cya kulwa. Mbivulukilu byela ku mateeta a bikondo. Kadi civulukilu cimwepele cikaadiku cyela ku diteeta mu mushindu mujaalame, citu n’Diyi dya Nzambi. Kaa, beena dyabulu’s bakaadi bateeteteete bwa kuDijima. Bakaadi benzenze byònsò bivwabo paabo mwa kwenza abi, kadi Dyôdi kadyakujimijiibwaku nansha. Kadyena mwa kupangilaku to.

<sup>93</sup> Abraham, paakapetaye civulukilu cya Nzambi aci ne: “Neupetele mwânà kudi mukaji awu, Sarah.” Munda mwa bidimu makumi abidi ne bitaanu, wakaciitabuujana ne mwoyi wende wònsò, ne wakavila cyònsò civwa cibegangana naaci, bwalu yêyè uvwa mumanye ne Nzambi uvwa mwa kushaala mukwate ku Diyi Dyende.

<sup>94</sup> Beena dyabulu, leelu ewu, badi bajuuka ne bateeta bwa kutampakaja Bible ne manyaanu. Kumpala kwa wèwè mufwanyineku kwimanyika Bible, bivwa bikengela wèwè kwanji kwimanyika bikondo kumpala kwa wèwè kucyenza. Bukwabantu bònsò batu kabayi biitabuujana diikalanganaku dya Nzambi, bantu bònsò batu kabayi biitabuujana diikalanganaku dya Nzambi aba, bònsò beena communisme aba, nansha biikale banganyi, mwena Bouddha yònsò, mwena Jain yònsò,

Muzulumanyi yônsò, mmwenzejiibwe bwa kufila bujaadiki bwa dilediibwa dya Mukalenge Yesu Kilisto, dituku dyônsò dicyacyà diiliilà edi. Ee, musangu wônsò wûdì anu wela cyâlà pa mukanda wûdì ufundilangana, amen, musangu wônsò wûdì anu ufunda dituku dya ngondo awu, udi ufila bujaadiki bwa ne Nzambi wakatuma Mwan'Ende, kukaadi bidimu cinunu ne nkama citeema ne makumi ataanu ne mwandamutekete. Mwaneetu, kwêna mufwanyineku kucyenza to. Kì mbifwanyine kwenzekaku to. “Maulu ne buloba nebijimine, kadi Mèyì Aanyi kaàkujìminakù to.”

<sup>95</sup> Kukaadi cikondo kampana, mvwa nsanganyiibwa mu New York, kupatuka kuya mu kaacisanga kakese, ku Lupingu lwa Budishikaminyi luvwabo bape. . . bukalenge bwa beena France bufile, bupeeshe Étas-Unis, kukaadi bidimu byàbûngi. Nenku mu cyanza cyalu mudi cimunyi cya bukênkè. Twêtù kuseemena ku diine diboko adi. Kudi dididiishi kwine aku. Kadi mwaba uvwa bukênkè ebu bukenkeshe awu, mêmè kumona panshi lwà ku luseke aku kwikale mushiki wa nyuunyi ya mishààmishà, miikale mifwe yônsò, miikale panshi myandanda ku luseke aku. Ke mêmè kukonka mulombodi ne: “Yàya mishààmishà nyaa bishi? Mmikwacike ku nzemu anyi?”

<sup>96</sup> Yèyè ne: “To, mukalenge. Katwena banji kuyangula bwa mu dinda emu to.” Yèyè ne: “Makeelela awu diloolo kuvwa mvula wa cipupu, mvula mukole wa cipupu mupicile mu cijengu cya màyì eci.”

Mêmè ne: “Eyowa’s, mukalenge. Aci ndi mumanye.”

<sup>97</sup> Yèyè ne: “Tunyuunyi etu mbatubucikile kudi mvula wa cipupu awu.” Ke yèyè ne: “Paalutu kubwela mu bukênkè ebu, kuteetatu bwa kujima bukênkè abu. Wamonu anyi? Ke kudikumatu anu ku lumwenu elu ne kudituuta.” Ke yèyè ne: “Pamutu paa kukwatatu mudimu ne bukênkè bwa kuyatu ku dikubiibwa, ke kuteetatu bwa kujima bukênkè abu.”

<sup>98</sup> Ke pa dibà adi disonsodiibwa kumvwiladi. Neya bushuwa. Balume ne bakaji bàdì bàteetà kujima Bukênkè bwa Nzambi abu, badi anu basumpakana cyanaana. Nenku, Bukênkè abu, bwa cinyi kabayiku bakwata naaBu mudimu bwa kuyabo ku dikubiibwa, pamutu paa nwênù kwikala nusumpakana cyanaana? Bateeta kuBuvila, bamba ne: “Matuku a bishima akaadi mamane kupita. Kakutu cintu paaci ne ndyondopa dya kudi Nzambi to, kakutu lupandu lwa mu ndondo wa mwoyi to, biine bintu ebi.” Bôbò’s badi anu badikuma ku dikunji cyanaana. Pacidibo anu benza nanku awu apu, Ekeleeziya munene wa Nzambi udi anu wenda uya kumpala ne wenda ubanda muulu, anu ne mwende mwônsò. Bantu bajuuka balaka mukana bamba mudibo *cikampanda*, ne *cikansanga*, kadi biikale bapangila, ne bikwabo. Kadi Ekeleeziya wa Nzambi pende’s ke kuyaye

kumpala eku, ne Dîyì dya Nzambi dyenda diya kumpala. Yêyè mmwenjiibwe ne byamu bya mushindu mujaalame.

<sup>99</sup> Abidi adi panshi aa, mwamwa mu Australie, Australie munene udi mwinshi mwa bukookeshi bwa Grande Bretagne awu, mmwenze anu mudi Afrike wa ku Sud, anu paudi ukosolola mutangile ku Australie apu. Mwamwa mu Sidney, kudi cimenga cinene ciikale cilwa cinyungulukile cijengu cya mâyì aci kuntwaku, pàmwâpa Mwaneetu Beeler yêyè mmufwanyine kumanya byàbûngì pa bwalu abu kumpita mêmè. Nansha nanku, bavwa bakeba kwibaka cilamba, cya cyumukila ku—ku Sidney wa ku Nord too ne ku Sidney wa ku Sud. Kwenzabo mabiikila mu ditunga dijima, bwa kupeta biibaki, biibaki baa bilamba, bwa kulwa kwibakabo cilamba ciine aci. Nansha umwe wa kudibo kavwa mufwanyine kwitaba mudimu awu to. Nansha umwe kaakadidinga kuwitaba to. Bavwa anu bafikaku, bôbò kusangana ne panshi paa mbû awu pavwa lusenga lwa lunyungakanangana. Ciwwa ndunteka, mu mushindu wa cintu nansha cimwe kaciyiku mwa kushaala ciimane to. Nenku bavwa anu benza kuluteeta ne kupima ndondo walu, kadi kuumuka kuya. Bamba ne: “To, katwena mene bafwanyine kubanga kuteeta bwa kwibaka cilamba cya mushindu ewu to. Kacyena mwa kwenjiibwaku to.”

<sup>100</sup> Paanyima paa cikondo kampanda, kulwaku mwibaki kampanda wa citende mufumine ku Angleterre, muntu mwende luumu, muntu mumanya ne ngwa kweyemenyiibwa, mwikale ne luumu lulenga.

<sup>101</sup> Kaa, ndi munangepu aci's we! Ntu munange muntu mwikale ne luumu. Kaa, kabyena bikengela anu bwa wêwè kwikala muntu munene to. Udi mwa kwikala mulanda wa nkùsù mu bilambà musòmbèle mu kajila kampanda, kadi mwikale ne luumu lulenga kutamba lwa mulombodi wa bukookeshi bwalabale. Kakuyi mpatà to. Kabyena bikengela anu bwa wêwè kwikala mubanji to. Udi wêwè mwa kwikala anu ne luumu lulenga cyanaana. Cidi cileeja ne, luumu lwebe alu ne cyûdi aci, ke bidi bikuwija cyûdi aci. Ke cidi cikupa luumu lwebe alu. Nenku udi mumanyikile ku luumu lwebe alu.

<sup>102</sup> Muntu ewu kuyaye kuntwaku ne luumu lulenga lwebe lwa dikema elu. Kutangilaye muvwa maalu emu ne emu. Kwendakanaye ku myelelu ya mâyì aku munda mwa ndambu wa matuku. Kucilongaye. Kuciteetaye. Kucipimaye ndondo. Kutangilaye eku ne eku. Paanyima pa cikondo kampanda, kuyaye kudi mulombodi wa cimenga, kwambaye ne: “Mêmè ndi ngiitaba bwa kwenza mudimu awu.”

“Mona's,” mwakamba awu, “mukalenge, udi mumanye cyûdi wangata aci anyi?”

Yêyè ne: “Ndi mucyũmwè mpala ne nyima.”

103 Yèyè ne: “Ee, mwibaki munene ewu yèyè’s udi wamba ne . . . Biibaki baa beena Amerike ne biibaki bàdì bafumine pa buloba bujima, biibaki baa bilamba, mbalwe kaaba aka, kadi biikale ne bwôwà bwa mudimu awu.”

104 Yèyè ne: “Kadi, mukalenge, mèmè ncyèna ne bwôwà bwa mudimu awu to. Ndi mèmè ngwitaba.” Yèyè ne: “Ndi mumanye bimpè ne ndi ne luumu lwa buloba bujima, bu mwibaki wa bilamba; kadi nêngèyèkè luumu lwanyi alu, bwalu ndi mwa kuciibaka.” Kaa, yèyè’s uvwa ne cikeena-kumona! Kumpala kwa muntu kupetaye luumu, bikengela ikale ne cikeena-kumona cya cidiye wenza aci.

105 Kaa, Mukelenge abeneshiibwe’s we! Ke bwa cinyi kudi Dyulu dya kuya. Ke bwa cinyi tudi mwa kwikala ne luumu bu mwena Kilisto, tudi bamanye ne mbyamu bya mushindu kaayi bidi mu nzubu mwibaka ewu. Ncya bushuwa. Mashi a Yesu Kilisto ngadi mu nzubu mwibaka ewu. Ncya bushuwa. Mashi Ende adi kaayi mwa kukupuka awu ngadi masukule mpekaatu yônsò. Yèyè mmunguumushe mu tujila twa iferno e kumvwija musadidi Wende. Pa dîbà adi, ndi muMwitabuuje. Pa nanku, ndi muumuke ku lufu muye ku Mwoyi. Ne mwena kwitabuuja yônsò mmwenze nanku awu, bwalu mmupete dyeyemena ne mmwitabuuje Mwibaki munene ewu, ne Muzodi munene wa bya diibaka ewu.

106 Mpindyewu, pàakacyènzà muntu awu, cintu cya kumpala cyakenzaye, bwa kutwishiibwaye ne mmubinge, yèyè wakapweka e kuya kuntwaku. Ke kwambaye ne: “Mpindyewu, kumpala kwa twètù kubanga kwibaka cilamba eci, bikengela tukafike too ne pa cishimikidi cya cishindame. Bikengela anu tukafikepu.” Úvwa mumanye ne mwinshi menemene mwa lusenga alu, muvwa difu dya buloba, divwà diikale lubwebwe lushindame. Cyakenzaye ncinyi piikalaci kaciyi dyangata dya mpompi ya minene? Ke kubwelayemu e kwasaye biimilonda binene panshi apu, ne kupèèpulayè lunteka alu, ne miine mpompi eyi, too ne mwakalwaye kulùpèèpula too ne kufika pa lubwebwe lushindame alu. Paakafikaye pa lubwebwe alu, kwashilaye lwongo lwa milonda minene ya nsalu eyi mwômò amu, ne kubilongololaye. Kubijikululaye ku cimwe ku cimwe.

107 Ke pashiishe kuyaye kangata, bamunyangulukile, biibaki baa batambe bwimpè bavwaye mwa kupeta abu, beena maalu a mamanya baa batambe bwimpè, bintu bya mudimu bya bitambe bwimpè. Kutumaye bwa kamukebelabo byamu bifiike bipeepele bwa cilamba cyende aci. Paakenzaye nanku, kavwaku mufwanyine kwelamu kantu nansha kamwè kaa cyamu cifiike cipeepele, nansha mene kaa mulonda wa nsalu to, anu pavwabo ne cya kwikala baciteete bilondeshile maalu a mamanya; bwa kumona ne muvwa mpungimpungi munda amu, bwa kumona ne muvwa tuumasoso twa lupeepele munda amu, mu mubanza amu, muvwabo bacyènzèle ne bacyèngülwile amu, bwa kumona

ne bavwa babiteete mu mushindu mujaalame anyi. Kaa, nci—ncivulukilu kaayi cidici cifwanyine kwikala's we, bu...bwa luumu lwende bu mwibaki wa bilamba.

<sup>108</sup> Piikalabi ne yêyê awu wakadipa lutatu bûngì nanku awu, bwa kwikalaye mutwishibwe ne cilamba aci civwa cifwanyine kwikala kacyi ne njiwu, nudi nwela meeji ne ndutatu bûngì kaayi lwakapeta Nzambi, bwa kwikala mutwishibwe ne Ekeleeziya ewu uvwa mwa kwikala kayi mu njiwu? Eyowa's, mukalenge. Kudi civulukilu cya lufu lwa Kilisto, ng'Ekeleeziya Wende. Bamwe bantu kabatuku baswe kwikala ne nsòmbelu waci to, bamwe bantu bôbò batu baswe. Kadi, ncikondo cya dyediibwa ku diteeta. Nzambi udi munkaci mwa kwela bantu ku mateeta, leelu wa Ndaaya ewu, bwa bivulukilu Byende.

Misangu yàbûngì, bantu batu bamba ne: “Kaa, ndi muteecibwe bikole be!”

<sup>109</sup> Dìnà dya Mukalenge dibeneshiibwe, bwa mateeciibwa! “Pândi mu butekete, ke pândi ne dikanda,” mwakamba Pòlò. “Mwànà yònsò udi ulwa kudi Nzambi, udi ne cya kwanji kuteeciibwa dyambedi ne kwediibwa ku diteeta.” Ne mateeta aa mmatambe kwikala a kalolo kunudi, ne matambe kwikala a mushinga mukole kunudi, kupita ngòlò wa mushinga mukole. Ncikondo cya dyediibwa ku diteeta.

<sup>110</sup> Kukaadi bidimu byàbûngì, kumpala kwa kwikalabo ne mashinyi adi engulula byamu, bavwa ne ciibidilu cya kwangata ngòlò...Nenku mushindu uwabò bafwanyine kumanya ne ngòlò awu uvwa mu yêyê anyi kavwa mu yêyê, ne bisota byònsò mbimane kuumukamu, bunyingunyingu bwònsò bwa soufre bwa cyamu cifiike abu (awu ke ngòlò wa muntu mukutakane), bwònsò bwa muntu mukutakane abu buumukemu, bôbò... Batuuci bavwa bamutuuta, ne bamutuuta bamukudimuna, ne bamutuuta bamukudimuna, too ne pavwa mutuuci awu umona cimfwanyi cyende—cyende mu ngòlò awu.

<sup>111</sup> Mushindu awu ke udi Nzambi wenza Ekeleeziya Wende. Ûdi ùkupà diteeciibwa pa diteeciibwa, diteeta pa diteeta, diteeciibwa pa diteeciibwa, diteeta pa diteeta, too ne paaleejiibwa Mwoyi wa Kilisto mu nsòmbelu webe; too ne pawalwa wa ditalala, mucinciki wa maalu, wa lutuulu, wa musangeelu, mudipwekeshe, mudilongolole, mukookele, wa budiswile, uumusha mpala ku maalu a pa buloba, ne mushaale kacya watangila buludi ku Kalvariyo, kudi Ewu Udi wenza dituuta adi awu. Misangu yàbûngì udi udyambidila ne bidi bikemesha bwalu bwa mateeciibwa miikale a kadilu, màsaamà, ne makengeshiibwa. Bidi byenjiibwa anu bwa kukuteeta, bwa kupatula bukooya mu wêwê, kupatula bisota mu wêwê, kupatula lujooko mu wêwê, kukutabuluja mu mushindu wa wêwê kupeta mwa kutangila ne kumona cimfwanyi, anyi bwa muntu kupetaye

mushindu wa kumona cimfwanyi cya Kilisto mu wêwè, “Kilisto munda mwebe, ditekemena dya Butumbi.”

<sup>112</sup> Kuteetaye kantu ne kantu. Ndekeelu wa byônsò, yêyè... Kumpala kwa kwelaye mulonda wa nsalu mwômô amu, wakawuteeta. Wakateeta bintu byônsò.

<sup>113</sup> Pashiishe paakamanaye kucyenza cyônsò, mpindyewu, baseki kadi kwimanabo ku luseke aku e kwambabo ne: “Kacyakushaalaku ciimane to. Kacyena mwa kwimanaku to.”

<sup>114</sup> Cyôci aci ncidibo bamba leelu ewu. “Mwine ntendelelu wa Nyuma Mwimpè ûdi wamba ewu, kaakunengaku to, mucu awu’s newoshike ubutuke wônsò.” Kadi kawena woshika ubutuka to.

<sup>115</sup> Kaa, mudilu’s udi anu uwumyamina mâyi cyanaana. Ûdi ùtùpa anu ditekemena dipyadipya cyanaana. Ûdi anu—ûdi anu ucipeesha dikanda cyanaana; diteeciibwa dyônsò, diteeta dyônsò. Musangu wônsò udi lupepele lutuuta ku mucu lwikale luwusaka kumpala ne paanyima, kumpala ne paanyima, ludi anu lulekeleja miji mu mushindu wa ne mucu awu udi mwa kutamba kubwela mu ndondo ne kukwata bîmpè menemene. Musangu wônsò udi disaama didikuma mu nzubu mwebe, musangu wônsò udi diteeciibwa didikuma mu nzubu mwebe, musangu wônsò udi beena mutumba bamba bwalu bubu bwebe wêwè, cidi anu cikunyukusha cyanaana, cikulekeleja, bwa umone mwa kupweka ne kutamba kushindama bîmpè pa Lubwebwe lwa Cyendeleele lwa Diyì didi kadiyi dinyunga dya Nzambi. Ke mushindu udi Nzambi ubyenza ngwôwò awu. Yêyè udi utuma mateeciibwa awu bwa kukuteeta ne kukujaadika, bwa kukunyukusha ne kukupa mushindu mupyamupya wa dikwata.

<sup>116</sup> Pashiishe tudi tusangana ne, paakamanaye kwenza byônsò abi, ke badyudi kwimanabo mwaba awu e kwambabo ne: “Kacyena mwa kukumbanaku to.” Kadi ncinyi? Mwibaki awu uvwa mumanye ne cilamba cyende aci neciimane. Ûvwa mumanye ne neciimane, bwalu civwa mwa kwikala citeeciibwe.

<sup>117</sup> Ke bwa cinyi Nzambi mmwambe ne: “Nêngiikalè ne Ekeleeziya kayi katoba anyi mufudi.” Amen. Ûvwa mupicile mu diteeta. Ne mwânà yônsò udi ulwa kudi Nzambi udi ne cya kuteeciibwa.

<sup>118</sup> Mu dituku dinene dya civulukilu adi, pakaavwabo baya, pakaavwa nseke ibidi ayi bayibangile ku nseke yônsò ibidi ayi, paakatwanganayi pankaci paa cijengu cya mâyi aci, muntu wâkaciibaka awu, kwambaye ne: “Même ncyakulomba muntu nansha umwe to.”

<sup>119</sup> Ke biibaki bônsò kwimanabo mwaba awu, bamba ne: “Padi anu dikankakana nansha dikese dilenga cilamba cyacya, necyupuke musangu umwe. Neciikale cya njiwu.” Kumpanyi wa assurance nansha umwe kavwaku mufwanyine kumupa assurance bwa cyôci aci to.

120 Yèyè kavwa dijinga ne assurance mwine to. Wakamba ne: “Cilamba cyanyi necishaale ciimane.” Ûvwa ne dyeyemena. Mpindyewu, ùdi ne cya kuciteeta, bwalu luumu lwende ndweyeka. Ncya bushuwa ne, ke mudibi nanku. Nenku bu cyôci mwa kushaala ciimane bulelela, civwa mwa kwikala civulukilu.

121 Ke bwa cinyi ndi mumanye ne lupandu lwa bikondo bya kale alu, lwa Nzambi, lwa mu ndondo wa mwoyi alu nelushaale lwimane: luumu lwa Kilisto ndweyekelaku. Yèyè kaakutupeesha cintu kampanda bwa kwibaka naaci Ekeleeziya to, kacyakwikala teoloji mukwatakaja kudi bantu to, kacyakwikala pa dilabula kampanda dya mu tulaasa to, anyi kwibaka seminere kampanda bu muvwabo baswe kwenza amu to, mu dinda emu, bwa kulongesha bayiishi mu tulaasa. Muiyiishi wa bushuwa udi ufumina mu seminere wa ngâsà wa Nzambi, dibiikila dya kudi Nzambi, ne dyôdi adi ndyela ku diteeta dya bikondo. Ncya bushuwa. Nedishaale dikwate. Nzambi mmukweyemene wêwè. Twètù tudi baMweyemene. Cilamba neciikale. . . Mwedi wa kasala wa kale wakamba ne:

Lwongo lwanyi ndukwate munda mwa  
cilambà cikudika.

Mu cipeepele cyônsò cya mvula mikole,

Lwongo lwanyi ndukwate munda mwa  
cilambà cikudika.

122 Katwena bamanye ne cidi cikwate ncinyi to, kadi Cintu kampanda ncikwate. Ncya bushuwa. Yèyè mmwele lwongo dyamwamwa mu mwaba wa ditalala ne dikubiibwa. Nenku kudi mwonji wa lupandu udi mukwate mwoyi wa muntu, ùdi wènga ne muntu ukâadikù mulediibwe cyakabidi mmuumuke ku lufu muye ku Mwoyi. Démons yônsò mipatuke mu iferno kî mmifwanyineku kumufikisha ku dicyela mpatà nansha. Kudi Cintu kampanda cikwate munda amu. Nansha bawutume eku ne eku! Nansha bawunyukushe! Amen. Newushaale anu kacya wakwata, musangu wônsò, bwalu udi mu Kilisto Yesu.

123 Pashiishe muntu awu kwambaye ne: “Mémè ncyakulomba muntu nansha umwe to, kadi,” yèyè ne, “nènye, mémè nkaayaanyi.”

124 Mulombodi wa cimenga kupatukaye e kwamba ne: “Mukalenge, mémè ndi bulelela ne dyeyemena mu cilamba cyebe aci.”

125 Yèyè ne: “Pawikala ne dyeyemena mu cilamba cyanyi, ndondaaku. Eyo, cyèlààku ku diteeta tũng.”

126 Mulombodi wa cimenga kwambaye ne: “Mashinyi aanyi neikale miimanepu mu diine dinda adi. Nènye neebe.”

127 Beena kumpanyi wa njila ya njanja kubiikilabo ku telefone e kwambabo, kubiikilabo e kwambabo ne: “Mukalenge, twètù tudi ne dyeyemena mu cilamba cyebe aci. Nebikengele bwa twètù. . .”

128 Yèyè ne: “Panwikala ne dyeyemena mu cilamba cyanyi, lwâyi ne mitu ya mazuwa inaayi myûle tente, nuyiteeke pa cilamba apa. Panwikala ne dyeyemena, ndondaayaaku. Nwênù biitabuuje ne cyôci nciteeta ne cipimiibwe, biitabuuje nanku, lwayaaku, nuye pamwe naanyi.”

129 Ke bantu bààbûngi kumufundilabo mikanda, pa kumona bukutu bwende. Cidi bantu bakeba kumona mbantu baa bukutu, kî nkaacintu kakese kaa katundubile nansha.

130 Pawikala wela meeji ne udi mwa kudikolesha ku mwoyi, mu diya dya mu ekeleeziya ne dyamba dya “amen” ku cikondo ne ku cikondo, ne dyela dya mbila ndambu, kufunda dîna dyebe mu mukanda, kadi kwalukila mwebe bwa kuya kiikala ne nsômbelu bu wa dyabulu, byenzedi byebe wêwê mwine’s bidi bijaadika cyûdi. Ngiikadilu webe’s mmucijaadike patooke. Kadi Nzambi . . .

131 Baa pa buloba mbaswe kumona bantu badi ne bukutu, muntu mwikale ne bukutu, wîkala mwa kwimana, bu civulukilu cya ngàsà udi usungila wa Yesu Kilisto. Ncya bushuwa.

132 Dituku dyàkabangà cilamba aci, bakwabo baa kudibo baakaalukila, kwamba ne: “Dilongololaayi. Longololaayi byamu byenu bya fôtô,” bôbô bônso, baakàmôna-kàmba bamba nanku, “bwalu cilamba aci necyupuke.”

133 Nsongaalume wa citende awu kupatukaye kwaka pa cilamba aci, kwimanyikayepu mashinyi ende, kupwekeshaye mèsù mutangile paanyima, kumonaye mitu ya mazuwa yônso ayi myele mulongo, kumonaye mulombodi wa cimenga kwaka umukupa cyanza. Kutangilaye e kumona binunu makumi bya beena lwà makàsà biimane paanyima pààpa, badilongolole bwa kwendelapu pamwe nende. Kwambaye ne: “Bangaayi ngoma ya lwendu.” Mwaneetu, paakabanga anu bisumbu bya beena misambu kwimba, tushiba twakeela mpelela, mpungi yakadila, ndi ngamba ne kwakenzeka dikankakana dya eyo. Kadi yèyè kwendela pa cilamba aci too ne dyamwamwa, kadi kaciyyiku mwa kunyunga to. Bwa cinyi? Wákadyenza yèyè mwine ntùngààmùlòngò, bwa ne, bu byôbì ne civwa cyupuka, upuke yèyè naaci.

134 Nenu Yesu Kilisto wakafuma mu Dyulu, mu Butumbi; kufuma mu Butumbi, kupweka panwapa, bwa kwibaka Ekeleeziya. Ne byamu bidiYe welaMu, mbyamu byela ku mateeta a bikondo. Wêwê udi mufwanyine kulwa ku cyoshelu bwa kwenza ditonda kampanda, kadi padiYe usanganamu masoso a lupeepele ne bikwabo byônso, wamonu’s, maalu a pa buloba—maalu a pa buloba mapèèpwile biinya munda mwebe, ne bikwabo, kwêna mwa kushaalaku mwimane to. Yèyè udi ukusaka anu ku luseke. Nzambi mmuswe Ekeleeziya mwela ku diteeta dya bikondo; kî mmuntu kampanda mwikale mwena Kilisto leelu kadi útwa cimpingà maalaba to, wàbwela



wàpatuka, wàbànda wàpweka. Yêyè kèna mwa kukuteekaku mwaba nansha umwe to.

<sup>135</sup> Kadi Yêyè udi ne Ekeleeziya udi muteeta, mupicile mu mateeciibwa, mupicile mu dijimija dya bintu, mupicile mu màsàamà, mupicile mu tunyinyanganya, mupicile mu lufu, kadi mucikàle anu kacya wimana ne bujaadiki. Ke muntu nyêyè awu, eyowa, ke muntu udiYe ukeba nyêyè awu. Nansha byôbì ne udi mulanda wa nkùsù mu bilàmbà. Nansha byôbì ne udi mulombyanganyi wa kaa pa luse. Nansha byôbì ne udi mwanguludi wa mikusu. Cyònsò cyùdi aci, Nzambi udi ukwela ku diteeta. Cidiye Yêyè ukeba mbyamu byela ku mateeta a bikondo. Ndi ngeela meeji ne, dimwe dya ku matuku adi panshi aa piikala Ekeleeziya munene awu . . .

<sup>136</sup> Padi, padi maalu a mamanya amba ne: “Mmunyi mudi buloba mwa kujimija? Dikokiibwa dya kudi buloba’s nedikulaminyine pa buloba apa.”

<sup>137</sup> Mpindyewu kadi ngaavu kuumvwa kòkò butendeleedi bwambwedi. Lekaayi nnupe mwanda’s we. [Mwaneetu Branham udi utuuta bintu pa cyambilu misangu isambombo—Muf.] Ekeleeziya mwela ku diteeta dya bikondo awu neikaleku dîngà dituku. [Udi ùtuuta kabidi cintu pa cyambilu musangu umwe ne pashiishe utuutakaja byanza musangu umwe.] Kudi kwa kwikala cyabibidi cimwe cyabo biikale balaale mu lupwishi lwa buloba. Ncyèna mumanye mwaba udibo to, kadi Nzambi ukaadi ne byamu Byende bya mudimu byònsò bimana kuteeta. Dîngà dituku Yêyè nealwe bwa kudyenza ntùngààmùlòngò ne: “Ndondaayi Mémè!” Anu apu kupanda kupicila buludi mu bibwashibwashi ne mu bipaapu bitumbuke, ne bipaapu ne bipaapu, ne Ùkabwela too ne mu Bwikadi bwa Nzambi wa Bukole bwònsò, mwikale ne Ekeleeziya mwela ku diteeta dya bikondo. Ke civulukilu cya ngàsà Wende ncyôci aci; ke civulukilu cidi Nzambi uMupa ncyôci aci.

<sup>138</sup> “Muntu nansha umwe kèna mwa kulwa Kùndi padi Taatu Wanyi kayi mumukoke to.” Ne muntu yònsò udi ulwa kudi Kilisto ndipà dya dinanga dya kudi Nzambi, ne Kilisto udi umwela ku diteeta. Nenku padiye utamba diteeta adi, Yêyè udi umwela mu cilamba, umunana umushidisha, umupa kaaba, ne umuteekapu, mumanye ne neashaale mwimane too ne kundekeelu kwa njila. Amen. Cyamu cya mudimu cyela ku diteeta dya bikondo!

<sup>139</sup> “Pa Lubwebwe elu,” kabiyi pa lubwebwe kampanda lwa dikolesha dya maalu, kabiyi pa mushiki wa masaluka, kabiyi pa mushiki wa teoloji wa ekeleeziya, kabiyi pa dingumba kampanda to. Kadi: “Pa Lubwebwe lushindame elu,” Dîyi dya Kilisto, “Nèngiibakilèpu Ekeleeziya Wanyi, ne biibi bya iferno kabyena mwa kuMutamba bukole to.” Yêyè’s neikaleku.

<sup>140</sup> Neikale civulukilu cya ngàsà Wende, mu bwikadi bwa Banjelo. Dituku dikwabo, paakaMukonka Banjelo ne: “Uyààya pa buloba bwa cinyi?” Yèyè neaalukile ne nealeeje Ekeleeziya awu kayi kalema, kayi katoba, kayi mufudi. Ke cyamu cya mudimu ncyôci aci. Ke cintu ncyôci aci. Luumu Lwende’s. Ûdi ne cya kucyenza. Mwibaki wa bilamba awu bivwa bikengela anu ibake cilamba aci; udi ne cya kucyenza, patupu udi ujimija luumu lwende. Kilisto neapete Ekeleeziya, ne Ûdi ne cya kupeta. Bwalu, Yèyè wakalwa pa buloba ne kwandamuka mubidi, ne kusòmbelayè munkaci mwetu; ne kushaalaye mpekaatu, bwa twètù twamona mwa kulwa baakane. Yèyè wakashaala twètù, bwa twètù, ku ngàsà Wende, twamona mwa kushaala Yèyè. Yèyè wakalwa bwa kwangata kaaba keetu, bu ngènzàmpèkààtù; bwa kutupa mushindu wa twètù kwangata kaaba Kende, bu bânà baa balume ne bânà baa bakaji baa Nzambi, mu Bwikadi bwa Udi Mutambe bunene. Ngàsà kaayi wa Nzambi’s we!

<sup>141</sup> Mmunyi mutudi bafwanyine kwamba ne: “Awu Méyì kî ngaa cya bushuwa”? Maulu ne buloba nebijimine, kadi Méyì awu kaàdyàkujiminakù to.

<sup>142</sup> Nsongaalume mukwabo mpofo wa citende wa ba-Indiens, kukaadi ndambu wa maloolo, mpofo kacya pacivwaye ne mbingu isatu–isatu anyi inayyi, mmupetulule lumònò lwende, anu mwende ne kale, ne kuumukaye pa cibumba cya ku cyambilu. Civwa ncinyi aci? Civwa ncivulukilu cya Bukole ne ngàsà bya Yesu Kilisto cyela ku diteeta dya bikondo. Dînà Dyende dya cijila dibeneshiibwe’s we!

<sup>143</sup> Byela ku mateeta a bikondo! Mateeta, ntatu, dinyukushiibwa, ne munyukunyuku, bidi anu bwa kujandula mpungimpungi mu wèwè, bwa kumona ne yidimu anyi. Nzambi ngudi ukunyukusha ne ukuteeta awu.

<sup>144</sup> Kukaadi cikondo kampanda, César Auguste munene, paanyima paa mvita minene kampanda yakenda luumu ayi, ne mupete bucimunyi bunene, yèyè. . . bavwa ne cya kumutwila cyanga mu Loomo. Ke yèyè kubambila ne: “Ndi muswe bwa muntu kampanda endele mu ditempu, muntu kampanda udi mwakanyine, bwa kwendelaye mu ditempu ku luseke lwanyi pândi ngenza cyôci eci apa.” Yèyè ne: “Ndi muswe bwa muntu kampanda abanyanganeku naanyi mabeneshaa.” Ke bônso. . . Bwalu kuyabu mu tumpoonyi twônso. Banene bônso baa basalaayi e kupungabo nsala yabo, ne kwengelejabo myele yabo ya mvita, ne kushiyabo bya mvita byabo bibalakana bikole, ne bikwabo byônso, ne kulongabo mwa kwimana basulame, ne dikosa dya mpala dya mushindu kampanda kumpala kwa mfumu wabo, ne bikwabo.

<sup>145</sup> Ke umwe ne umwe kuseemena, bya mvita byende binene kumpala kwende, pavwaye yèyè musòmbè mwaba awu pa nkwasà wende wa butumbi apu, mwikale ubandila. Ke kulwaku

mwaba awu, munene kampanda wa basalaayi, ne nsala yende minene milenga ya dikema, kakuyi kalema to, kwimanaye ne kukosaye mpala. César kushikulaye mutu; awu kwasaye lwendu e kuyaye. Mukwabo kuseemenaye, kukosaye mpala. César kushikulaye mutu; awu kwasaye lwendu e kuyaye. Ku musangu ne ku musangu, musalaayi uya mukwabo upingana.

<sup>146</sup> Ndekeelu wa byònsò, lwà kwìnshi kwa mulongo aku, kulwaku kalumyana kakwabo kalwanganyi kaa mvita kaa ku makàsà. Yèyè kavwaku ne ngabu mwine wa dyengeleja to, ne kavwa mene ne nsala wa dipungaye to. Kadi kulwaye wenda tamakatamaka too ne kumpala kwa César. Kavwa nansha mumanye mwa kukosa mpala bilenga to, kadi kwinyikaye anu mutu cyanaana kadi kwasaye lwendu e kuyaye.

<sup>147</sup> César kwambaye ne: “Imanabi tǔng. Wèwè udi nganyi? Anji alukilabi mwaba ewu tǔng.” Kuseemenaye mwaba awu. Kumujoojaye. Kuvwa bibangu kwìsù kwònsò eku, ne mputa ya milengu, kwìsù kunyangukangane kwònsò, wenda utebuka. Yèyè ne: “Abi bibangu udi mubipetele penyi?”

Yèyè ne: “Mwamwa mu cyalu cya mvita, pàmvwà ndwangana mvita bwa mukalenge wanyi, César.”

<sup>148</sup> Yèyè ne: “Bànda mwaba ewu usombe ku luseke lwanyi eku. Wèwè kadi ke udi muteciibwe ne mujaadikiibwe.”

<sup>149</sup> Mwaneetu, eci kî ncikondo cya dipunga dya nsala to, aa kî mmatuku a dilongeshangana dya tulaasa to. Eci ncikondo cya dyediibwa dya ku diteeta dya bikondo. Ncikondo cidi Nzambi uteeta Ekeleeziya Wende bwa kujandula bibangu bya mu mvita bya ku mateeta malule, ne dilwangana, ne mvita. Ke yèyè awu wèndela pa kabalu ku luseke Lwende.

<sup>150</sup> Mushindu mwine wàkateeciibwà ne wàkajaadikiibwà Elisha, kumpala kwa kumonaye mwa kuvwala muzabi wa muprofeta awu! Mushindu mwine wakeela Elisha muzabi awu pa dikaaya dyende! Mushindu mwine uvwaye ne cya kwikala muntu mwine uvwa ukengediibwa's! Elisha wakamutangila talala mu budimi mwamwa, pavwaye udima ne ditempu dya nkasu apu. Nzambi kwambaye ne: “Ke muntu nyèyè awu. Ke muntu nyèyè awu udi mwa kuvwala ciwvalu aci. Ke muntu nyèyè awu udi mwa kuvwala muzabi awu. Yèyè ke udi mwa kwangata kaaba keebe.”

<sup>151</sup> Dìnà dya Mukalenge dibeneshiibwe's we! Mushindu mwine udi disù Dyende didi dimona byònsò adi diikale dyendakana pa buloba bujima, diteeta bwa kupeta muntu kampanda wíkala mwa kuvwala muzabi wakambaYe awu. “Udi mwa kunwa lupanza lùndì Mèmè nnwa anyi? Udi mwa kubatiijiibwa ne dibatiiza dîndì Mèmè mbatiijiibwa anyi? Eyo,” mwakambaYe bwa cyôci aci.

<sup>152</sup> Pa nanku, twètù, leelu ewu, bu Ekeleeziya, bikengela uvwale muzabi wa Kilisto; bya mvita byònsò bya Kilisto, ngabu mujima

ne cibwikilu cya pa cyâdi, ne bya mvita, bwa twêtù kwimana katuyi ne kadyuwu mu Dituku adi. Yèyè udi munkaci mwa kukeba bivulukilu byela ku mateeta a bikondo, mu mushindu wa Yèyè mufwanyine kwamba ne: “Ke musadidi Wanyi nyèyè awu. Ndi mumwele ku diteeta. Ndi mumupime. Ndi mumupicishile mu lutatu lukole, bu Yobo. Ûcidi anu mujaadikiibwe lukama pa lukama.” Nzambi ikaleku neetu luse, bwa twamonaku mwa kukwata Nzambi ku Dìyì Dyende, ne kwikala bivulukilu byela ku mateeta a bikondo.

Tusambilaayi.

<sup>153</sup> Taatu mubeneshiibwe, tudi tuKwela twasakidila, Nzambi Mutambe Cijila, byumukila mu ndondo menemene wa myoyi yetu, bwa dyediibwa dya ku mateeta a bikondo, diteeciibwa dyònsò. Katwena tudyumvwa bibi bwa ôwò awu to, Mukalenge, kadi tudi ne kusakidila mudi ngâsà Webe mwikale mukumbane bwa kutukwacisha mu dipicila dya mu bikondo binene bya diteeciibwa ebi.

<sup>154</sup> Bu mudibi ne muntu ewu, diloolo edi, mushindu mwine udi bi bitupishe myoyi ya bateeleji ne disanka, padiye muteele ne: “Ngâsà Udi Ukèmeshà,” ne patwafiki ku ciine cituminyi aci.

Mu njiwu yàbûngi, midimu mikole ne mateyi,  
Mmûnkaadi mupicile;  
Ngâsà ngudi mumfikishe too ne apa kakuyi  
njiwu ewu,  
Ngâsà ke watungunuka naanyi.

<sup>155</sup> Kaa, aci's neitupishe myoyi ya bantu ne disanka! Tudi twitabuuja ne mbikumbanangane ne Diyiisha dya diloolo edi, bwa ne civwa ndyediibwa dya ku diteeta dya bikondo, kupicila mu njiwu, midimu mikole ne mateyi. Civwa mbwa kukwacisha mwena Kilisto, ewu udi mudikenkete yèyè mwine mpindyewu ne mumanye ne mmwimane mu lulamatu, ku ngâsà wa Nzambi. Civwa mbwa kutwala bundu kudi aba badi badishinda bibula, ne badi bààbànda bààpweka, kadi kabayi babicyuka to, ne biikale ne nsòmbelu wa kalèngù. Èyì Nzambi, kabayiku nansha ne cibangu cya mu mvita bwa kuleejaku ne mbalwangane mvita to. Tudi tulomba diloolo edi, Mukalenge, bwa Wèwè kujidila Ekeleeziya, ku Mashi Ebe manene a cijila, ne kuumusha mpungimpungi yònsò, ne myaba yònsò ya butekete, ne—ne bilàmbà byònsò bikaadi binunka ebi. Ubipicishileku cyakabidi mu mashinyi, ne—ne ubyākàjùlùlèku, Mukalenge, ne—ne ubivwije cyamu cya mudimu. Èyì Taatu wa Cyendelele ne mubeneshiibwe, teelejaku disambila dya musadidi Webe.

Ne patucidi ne mitu yetu miinyika apa.

<sup>156</sup> Bu kwòkò mwa kwikala muntu kaaba aka diloolo edi, udi mufwanyineku kudyumvwa ne Nzambi, mu bikondo bya dyelangana dya ku mateeta ebi, kacya katu mwanji kukupetaku ne lulamatu pa mwaba webe wa mudimu. Padi makokyanganyi

ajuuka, anyi wêwè utu utupikilamu buludi bwa kubwelamu anyi? Padi matandu ajuuka, dibenga kucyuka dya maalu, pakaadi tunsungansunga tujuuka mu ekeleeziya, utu uditeeka ku luseke lwa tusumbu twa bukwa ne bwena, ne bikwabo bya mushindu awu anyi? Utu uteeleja bijaanu bya mu misèèsù ne bya mu myaba ya mu nyungulukilu wa myaba yûdi usanganyiibwa anyi? Pawikala mupiile ku bya nanku awu, mwikale mupacisha ne lupeepele kudi dyabulu, twalukile ku cikutu cya kapya, diloolo edi, bwa twenguludiibwe cyakabidi, ne tupatuke katuciyi kabidi naabi munda mwetu to. Nzambi atutelakajeku ne atulongolole bwa Cilamba cinene eci cyàngatè Dyambwibwa dyaCi. Muntu wa mushindu awu yèyè mwikale kaaba aka, ne mwikale ne dijinga dya kumuvuluka!

157 Wêwè udi wamba ne: “Mwaneetu Branham, mmunyi mûndi mwa kumanya ne civulukilu cidi kaciyi cifwa, cya Cyendelele eci necishaale kacya anu cîmana?”

158 Nênkutèlèlèlè Dîyi Dyende, bilondeshile Yone 5.24. “Ewu udi uumvwa Dîyi Dyanyi.” (Kî nne “Udi uya mu kalaasa Kaanyi” to.) “Ewu udi uumvwa Mèyi Aanyi, ne witabuuja Ewu udi muNtume, udi ne Mwoyi wa Cyendelele, ne kaakupicilaku ku cilumbulwidi to; kadi mmuumuke ku lufu muye ku Mwoyi.”

159 Udiku mwa kuumvwa Dîyi Dyende dikubîikila, diloolo edi anyi? Pawikala mwa kuumvwa, ne muswe bwa kukuvuluka mu disambila, swaku wèlè cyanza muulu. Amba ne: “Mwaneetu Branham, nsambidileku anu cyanaana. Ndi muswe kwikala cyamu cya mudimu cya mushindu mujaalame, mu mushindu wa ne piikala Kilisto mwa kupatula Ekeleeziya Wende, mêmè nciikadi . . .” Nzambi akubeneshe, mukalenge. “Ncyakwikala ntankakana pa cyôci aci to, Yèyè neanteeke buludi mu Ekeleeziya.” Nzambi akubenseshe, wêwè nsongaalume. Nzambi akubeneshe, mwaneetu wa bakaji. “Ndi muswe kwikala . . .” Nzambi akubeneshe, mwaneetu wa balume. “Ndi muswe kwikala cyamu cya mudimu cya mushindu mujaalame.” Nzambi akubeneshe, mwànà mukese udi paanyima pàapa wawa. Nzambi akubeneshe mwaba ewu, wêwè mwaneetu wanyi wa balume munanga. “Ndi muswe balwe kunsangana bu cyamu cya mudimu cilelela. Ndi muswe kwikala mukumbane bwa kufila bujaadiki bwa ditekemena didi disanganyiibwa munda mwanyi; ditekemena!” Nzambi akubeneshe, mwaneetu wa bakaji. Abi mbîmpè. Ncyá bushuwa.

“Bidi byenza cinyi, Mwaneetu Branham, kwine kwela kwa byanza byanyi muulu aku?”

160 Udi uumuka ku lufu uya ku Mwoyi. Ke cyûdi wenza ncyôci aci. Udi unyangakaja mukenji wônso wa dikokiibwa dya kudi buloba, anu mwaba awu. Wamonu’s, bu wêwè mwikale anu muntu-lupingu cyanaana musòmbè mwaba awu, nunku kuvwaku mwa kwela cyanza cyebe aci muulu to. Kuvwaku mwa

kucyenza to. Kadi bidi bileeja ne kudi nyuma kampanda munda mwebe amu, nyuma kampanda, ne nyuma awu wũmvù Nyuma wa Nzambi wakula neebe. Nenku nyuma udi munda mwebe awu wängàci dipangadika, pa nanku aci cidi cyela maalu a mamanya kadyombo. Cidi cyela dikokiibwa dya kudi buloba kadyombo. Padici cyediibwa muulu, bidi bileeja ne kudi nyuma kampanda munda mwebe, udi mwa kujuula cyanza cyebe aci kuulu. Bu ne wêwè uvwa mufwe, kuvwa mufwanyine kucyenza to, kadi udi mulwe ku Mwoyi. Cintu kampanda ncyenzeke.

<sup>161</sup> Wêwè mufwe mu mpekaatu ne mu matomboka, Nzambi kêna mwa kwakula neebe kabidi to, cyanza cyebe necishaale cipwekesha panshi. Pawikala kuyi mufwe mu mpekaatu ne mu matomboka to, ne Nzambi mwikale mwa kwakula neebe, ne wêwè upeta Mwoyi, newêlè cyanza cyebe aci muulu. Wamonu's, bidi bileeja ne Mwoyi awu wängàci dipangadika, wêwè witabi Kilisto. "Udi muumuke ku lufu muye ku Mwoyi," pawikala ucyamba wambilamu.

<sup>162</sup> Ikala ucyamba wambilamu mpindyewu, paudi wela cyanza cyebe muulu apu. Amba ne: "Nzambi, ikalaku naanyi luse, mvwijeku civwa cikengela mêmè kwikala aci. Nenku nênkukwàcìlè mudimu mu nsòmbelu wanyi yònsò. Ndi muswe nsanganyibwe mudilongolole mu dituku adi." Mabenesha akulandale, mwaneetu wa balume munanga udi lwà paanyima pààpa wawa. Nzambi akubeneshe, wêwè nsongaalume. Nzambi akubeneshe wêwè awu, mwaneetu wa balum- . . . Nzambi ikale neebe. Nzambi akubeneshe, munanga wanyi. Eyo, muntu mukwabo. Nzambi akubeneshe mwab'ewu, Mwaneetu Roy, ne Mukalenge ikale neebe. Eyowa. "Mukalenge, nsangànekuku mukumbanyine. Nsangànekuku mukumbanyine." Nzambi akubeneshe, mwaneetu wanyi wa balume lwà mundekeelu mwamwa. Ncya bushuwa ne, Nzambi mmukumone. Ikala ne disanka. Kudiku muntu mukwabo udi muswe bwa bamuvuluke mu disambila mpindyewu mene anyi? "Mvwijeku . . ." Eyo. Twikalaayi . . .



*BIVÜLUKILU BYÀ NZAMBÌ BYELA KU MATEETA À BIKONDO* LUA57-0818  
(Time-Tested Memorials Of God)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu diloolo, matuku 18 a ngondo wa mwandamukulu, cidimu cya 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa méyì ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2017 VGR, ALL RIGHTS RESERVED

**VOICE OF GOD RECORDINGS**  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)